

水
經
注

ル 5
980
9



水經第三十二



漢桑欽撰

後魏酈道元注

明吳中珩校

澠水 蘄水 泚水

泄水 肥水 沮水

漳水 夏水 羗水 涪水

潼水 涔水

澠水出江夏平春縣西

澠水北出大義山南至厲鄉西賜水入焉水源東

出大紫山分爲上水一水西逕厲鄉南水南有重
山卽烈山也山下有一穴父老相傳云是神農所
生處也故禮謂之烈山氏水北有九井子書所謂
神農旣誕九井自穿謂斯水也又言汲一井則衆
水動井今堙塞遺迹髣髴存焉亦云鄉故賴國也
有神農社賜水西南流入于溲卽厲水也賜厲聲
相近宜爲厲水矣一水出義鄉西南入隋又注溲
溲水又南逕隋縣注安陸也

南過安陸入于溲

蘄水出江夏蘄春縣北山

山卽近柳也水首受希水枝津西南流歷蘄山出
蠻中故以此蠻爲五水蠻水卽謂巴水也又赤亭
水西歸水蠻左馮居岨藉山川世爲抄暴宋世沈
慶之於西陽上下誅伐蠻夷卽五水蠻也

南過其縣西

晉改爲蘄陽縣縣從江州置大陽戍後齊安郡移
治於此也

又南至蘄口南入于江

蘄水南對蘄陽州入于大江謂蘄口洲上有蘄陽
縣徙

水經 卷之三十二 二
決水出廬江雩婁縣南大別山

俗名之爲檀山峴蓋大別之異名也其水歷山委注而絡其縣也

北過其縣東

縣故吳也春秋左傳襄公二十年楚子秦人侵吳及雩婁聞吳有備而還是也晉書地道記云在安豐縣之西南卽其界也故地理志曰決水出雩

又北過安豐縣東

決水自雩婁縣北逕雞備亭春秋昭公二十三年吳敗諸侯之師于雞父者也安豐縣故城今邊城

郡治也王莽之美風也世祖建武八年封大將軍涼州牧竇融爲侯國晉立安豐郡決水自縣西北流逕蓼縣故城東又逕其北漢高帝六年封爲孔侯國也世謂之決水也水又西北灌水注之其水導源廬江金蘭縣西北東陵鄉太蘇山卽注水也許慎曰出雩婁縣俗謂之澮水也楮先生所謂神龜出于江灌之間嘉林之中蓋謂此水也灌水東北逕蓼縣故城西而北注決水也故地理志曰決水北注蓼入灌灌水於蓼亦入決春秋宣公八年冬楚公子滅舒蓼臧文仲聞之曰臯陶庭堅不祀

水經 卷之三十三
忽諸德之不逮民之無援哀哉決水又北右會陽
泉水水受決水東北流逕陽泉縣故城東故陽泉
鄉也漢靈帝中封太尉黃琬爲侯國又西北流左
入決水謂之陽泉石也

又北入于淮

俗謂之決口非也斯決灌之口矣余往因公至于
淮津舟車所屆次于決水訪其民宰與古名全違
脉水尋經方知決水蓋灌澮聲相倫習俗害真耳
泚水出廬江濳縣西南霍山東北

濳者山水名也開山圖濳山圍繞大山爲霍山郭

景純曰濳水出焉縣卽其稱矣春秋昭公二十七
年吳因楚喪圍濳是也地理志曰泚水出泚山不
言霍山泚字或作淠水又東北逕博安縣泄水出
東北過六縣東

淠水東北右會踰鼓川水水出東南踰川西北流
左注淠水淠水又西北逕馬亭城西又西北逕六
安縣故城西縣故咎陶國也夏禹封其少子奉其
祀今縣都陂中有大冢民傳曰公琴者卽臯陶冢
也楚人謂冢爲琴矣漢高帝元年別爲衡山國五
年屬淮南文帝十六年復爲衡山國武帝元狩二

年別爲六安國王莽之安風也漢書所謂以舒屠
六晉太康三年廬江郡治淠水又西北分爲二水
出焉又北逕五門亭西西北流逕安豐縣故城西
晉書地道記安豐郡之屬縣也俗名之曰安城矣
又北會濡水亂流西北注之

北入于淮

水之決會謂之泚口也

泄水出博安縣

博安縣地理志之博鄉縣也王莽以爲楊陸矣泄
水自縣上承北水於麻步川西北歷山濡谿謂之

濡水也

北過芍陂西與泚水合

泄水自濡谿水安風縣北流注于淠一謂之其濡

口

西北入于淮

亂流同國也

肥水出九江成德縣廣陽鄉西

呂忱字林曰肥水出良餘山俗謂之連枷山亦或
以爲獨山也北流分爲二水施水出焉肥水又北
逕獲城東又北逕荻江東又會施水枝津首受施

水於合肥縣城東西流逕成德縣注于肥水也
肥水別北過其縣西北入芍陂

肥水自荻丘北逕成德縣故城西王莽更之曰平
阿也又北逕芍陂東又北逕歿馬塘東芍陂瀆上
承井門與芍陂更相通注故經言入芍陂矣肥水
東北又合閻潤水上承施水於合肥縣北流逕復
道縣西水積爲陽湖陽湖水自塘西北逕歿亭
南夾橫塘西注宋太始初豫州司馬劉順帥衆八
千據其城地以拒劉劭杜叔寶以精兵五千送糧
歿亭劉劭破之此塘水分爲澗二洛澗出焉閻漿

水注之水受芍陂陂水上承謂水於五門亭南別
爲斷神水又東北流逕五門亭東亭爲衆水之會
也斷神水又東北逕神迹亭東又北謂之豪水雖
廣異名事實一水又東北逕白芍亭東積而爲湖
謂之芍陂陂周一百二十許里在壽春縣南八十
里言楚相孫叔敖所造魏太尉王陵與吳將張休
文戰於芍陂卽此處也陂有五門吐納川流西北
爲香門陂水北逕孫叔敖祠下謂之芍陂瀆又北
分爲二水一水東注黎漿漿水東逕黎漿亭南文
欽之叛吳軍北入諸葛緒拒之於黎漿卽此水也

東注肥水謂之黎漿水口

又北過壽春縣東

肥水自黎漿北逕壽春縣故城東爲長瀨津津側有謝堂北亭迎送所薄水陸舟車是焉萃止又西北左合東谿谿水引瀆北山西南流逕導公寺西寺側因谿建刹五層屋宇闕敞崇虛携覺也又西南流注于肥肥水又西逕東臺下臺卽壽春外郭東北隅阿之榭也東側有一湖三春九夏紅荷覆水引瀆城隍水積成潭謂之東臺湖亦肥南播也肥水西逕壽春縣城北右合北谿水導北山泉源

下注漱石頽隍水上長林插天高柯負日出於山林精舍右山淵寺左道俗嬉遊多萃其下內外引汲泉同七淨谿水泂注西南逕陸道士解南精廬臨側川谿大不爲廣小足閒居亦勝境也谿水流注于肥水

北入于淮

肥水又西分爲二水右卽肥之故瀆遏爲船官湖以置舟艦也肥水左瀆又西石橋門北亦曰草市門外有石梁渡此洲洲上有西昌寺寺三百阻水佛堂設三像真容妙相相服精偉是蕭武帝所立

也寺西卽船官坊倉光都水是營是作湖北對八
公山山無樹木唯重阜耳山上有淮南王劉安廟
劉安是漢高帝之孫厲王長子也析節下士篤好
儒學養方術之徒數十人皆爲俊異焉多神仙祕
法鴻寶之道忽有八公皆鬚眉皓素詣門希見門
者曰吾王好長生今先生無住衰之術未敢相聞
八公咸變成童王甚敬之八士並能鍊金化丹出
入無間乃與安登山埋金於地白日昇天餘藥在
器雞大舐之者俱得上昇其所昇之處踐石皆陷
人馬跡存焉故山卽以八公爲目余登其上人馬
之跡無聞矣唯廟像存焉廟中圖安及八士像皆
坐牀帳如平生被服纖麗咸羽扇裙帔巾壺枕物
一如常居廟前有碑齊永明十年所建也山有隱
室石井卽崔琰所謂余下壽春登北嶺淮南之道
室八公石井在焉亦云左吳與王春傳生等尋安
同詣玄洲還爲著記號曰八公記都不列其雞犬
昇空之事矣按漢書安反伏誅葛洪明其得道事
備抱朴子及神仙傳肥水又左納芍陂瀆瀆水自
黎漿分水引瀆壽春北逕芍陂門右北入城昔鉅
鹿時苗爲縣長是其留犢處也瀆東有東都街街

之左道北有宋司空劉劭廟宋元徽二年建于東鄉孝義里廟前有碑時年碑功方創齊永明元年方立沈約宋書言太始元年豫州刺史殷琰叛明帝假劭輔國將軍討之琰降不犯秋毫百姓來蘇生爲立碑文過其實建元四年故吏顏幼明爲其廟銘故佐寵埏爲妙讚夏侯敬友爲廟頌並附刊于碑側瀆水又北逕相國城東劉武帝伐長安所築也堂宇廳館仍故以相國爲名又北出城注肥水又西逕金城北又西左合羊頭谿水水受芍陂西北歷羊頭谿謂之羊頭澗水北逕熨湖左會烽

水瀆瀆受淮於烽村南下注羊頭谿側逕壽春城西又北歷象門白沙門北出金城西門逍遙樓下北注肥瀆肥水北注舊瀆之橫塘爲玄康南路馳道左通船官坊也肥水逕玄康城西北流水北出際有曲水堂亦嬉遊所集也又西北流昔在晉世謝玄北禦苻堅祈八公山及置陣於肥水之濱堅望山上草木咸爲人狀此卽故戰敗處非八公之靈有助蓋苻氏將亾之惑也肥水又西北注于淮是曰肥治也

施水亦從廣陽鄉東南入于湖

施水受肥於廣陽鄉東南流逕合肥縣應劭曰夏水出城父東南至此與肥合故曰合肥闕駟亦言出沛國城父東至此合為肥余案川亾派別無公注之理方知應闕二說非實證也蓋夏水暴長施合於肥故曰合肥也非謂夏水自城父東逕合肥縣城南居四水中東又有道逢津水上舊有梁孫權之攻合肥也張遼敗之於津北橋不撤者兩版權與甘寧蹴馬趨津谷利自後著鞭助勢遂得渡梁凌統被鎧落水後到追亾流涕津渚施水又東分為二水枝水北出焉下注陽淵施水又東逕東

口戍東注巢湖謂之施口也

沮水出漢中房陵縣淮水東南過臨沮縣界

沮水出東汶陽郡沮陽縣西北景山即荆山首也高峰霞舉峻竦層雲山海經云金玉是出亦沮水之所導故淮南子曰沮出荆山高誘云荆山在左馮翊懷德縣蓋以洛水有漆沮之名故也斯謬證耳杜預云水出新城郡之西南發阿山蓋山異名也沮水東南流逕沮陽縣東南縣有潼水東逕其縣南下入沮水水又東南逕汶陽郡北即高安縣界郡治錫城縣居郡下城故新城之下邑義熙初

分新城立西表悉重山也沮水南逕臨沮縣西青谿水注之水出縣西青山山之東有濫泉卽青谿之源也口徑數丈其深不測其泉甚靈潔至於炎陽有亢陰雨時以穢物投之輒能暴雨其水導源東流以源出青山故以青谿爲名尋源浮谿奇爲溪峭盛弘之云稠水傍生凌空交合危樓傾岳恒有落勢風泉傳響於青林之下巖後流聲於白雲之上遊者常若目不周翫情不給賞是以林徒栖託雲客宅心泉側多結道士精廬焉青谿又東流入于沮水沮水又屈逕其縣南晉咸和中爲沮陽郡治也沮水又東南逕當陽縣北縣城因岡爲阻北抗沮川其故城在東一百四十里謂之東城在綠林長板南長板卽張翼德橫矛處也沮水又東南逕驢城西磨城東又南逕麥城西昔關雲長詐降處自此遂叛傳云子胥造驢磨二城以攻麥邑沮水又南逕楚昭王墓東對麥城故王仲宣之賦登樓云西接昭丘是也沮水又南與漳水合焉又東南過枝江縣東南入于江

沮水又東南逕長城東又東南流注于江謂之沮口也

漳水出臨沮縣東荆山東南過蓼亭又東過章鄉南
 荆山在景山東一百餘里新城沛鄉縣界雖羣峰
 競舉而荆山獨秀漳水東南流又屈西南逕編縣
 南縣舊東北一百四十里高陽城西南移治許茂
 故城城南臨漳水又南歷臨沮縣之彰鄉南昔關
 羽保麥城詐降而遜潘璋斬之於此漳水又南逕
 當陽縣又南逕于麥城東王仲宣登其東南隅臨
 漳水而賦之曰夾清漳之通浦倚曲沮之長洲是
 也漳水又南滄水注之山海經曰滄水出東北宜
 諸之山而流注于彰水

又南至枝江縣北鳥扶邑入于沮

地理志曰禹貢東條荆山在臨沮縣之東北漳水
 所出東至江陵入楊水注于沔非也今漳水於當
 陽縣之東南一百里餘而右會沮水也

夏水出江流于江陵縣東南

江津豫章口東有中夏口是夏水之首江之汜也
 屈原所謂過夏首而西浮顧龍門而不見也龍門
 卽郢城之東門也

又東過華容縣南

縣故容城矣春秋魯定公四年許遷于容城是也

水經 卷之三十三
北臨中夏水自縣東北逕成都郡故城南晉永嘉
中西蜀阻亂割華容諸城爲潁王都夏水又逕交
阯太守胡寵墓北漢太傅廣身陪陵而此墓側有
廣碑故世謂廣冢非也其文言是蔡伯喈之辭歷
范西戎墓南王隱晉書地道記曰陶朱冢在華容
縣樹碑云是越之范蠡晉太原地記盛弘之荊州
記劉澄之記並言在縣之西南郭仲產言在縣東
十里檢其碑題云故西戎令范君之墓碑文缺落
不詳其人稱蠡是其先也碑是永嘉二年立觀其
所述最爲究悉似親逕其地故違衆說從而正之

水又東逕監利縣南晉武帝太康五年立縣土卑
下澤多陂池西南自州陵東界逕于雲杜沌陽爲
雲夢之藪矣韋昭曰雲夢在華容縣按春秋魯昭
公三年鄭伯如楚子產備田具以田江南之夢郭
景純言華容縣東南巴丘湖是也杜預云枝江縣
安陸縣有雲夢蓋跨川亘隰兼苞勢廣矣夏水又
東夏楊水注之水上承楊水於競陵縣之柘口東
南流與中夏水合謂之夏楊水又東北逕江夏惠
懷縣北而東北注

又東至江夏雲杜縣入于沔

應劭十三州記曰江別入沔爲夏水源夫夏之爲名始於分江冬竭夏流故納厥稱既有中夏之目亦苞大夏之名矣當其決水之所出謂之贖口焉鄭玄注尚書滄浪之水言今謂之夏水來同故世變名焉劉澄之著永初山川記云夏水古文以爲滄浪漁父所歌也因此言之水應由沔今按夏水是江流沔非沔入夏假使沔注夏其勢西南非尚書又東之文余亦以爲非也自贖口下沔水通兼夏目而會于江謂之夏沔也故春秋左傳稱吳伐楚沈尹射奔命夏沔也杜預曰漢水曲入江卽夏

口矣

羌水出羌中叅糧

彼俗謂之天池白水矣地理志曰出隴西羌道東南流逕宕昌城東西北去天池五百餘里水又東南逕宕昌婆川城東南北注羌水昔姜維之寇隴右也聞鍾會入漢中引還知雍州刺史諸葛緒屯橋頭從此谷將出北道緒邀之此路繼更從此道渡橋頭入劔閣緒追之不及羌水又東南陽部水注之水發東北陽部谿西南逕安民戍又西南注羌水又東南逕武階城西南又東南葭蘆城西羊

湯水入焉水出西北陰平北界湯谿東南逕北部
城北又東南逕三部城南東南右妾水合傍西南
出卽水源所發也羌水又逕葭蘆城南逕餘城南
又東南左會五會水水有二源出南北五部谿西
南流合爲一水屈而東南注羌水羌水又東南流
至橋頭合白水東南去白水縣故城九十里
又東南至廣魏白水縣與漢水合又東南過巴郡閬
中縣又南至墊江縣東南入于江涪水出廣魏涪縣
西北

涪水出廣漢屬國剛氏游徼外東南流逕涪水西
王莽之統睦臧宮進破涪城斬公孫恢於涪自此
水上縣有潺水出潺山水源有金銀礪洗取火合
之以成金銀潺水歷潺亭而下注涪水涪水又東
南逕縣竹縣北臧宮溯涪至平陽公孫述將王元
降遂拔綿竹涪水又東南與建始水合水發平洛
郡西谿西南流屈而東西流入於涪涪水又東南
逕江由戍北鄧艾自陰平景谷步道縣兵束馬入
蜀逕江由廣漢者也涪水又東南逕南安郡南又
南與金堂水會水出廣漢新都縣東南流入涪涪
水又南枝出焉西逕廣漢五城縣爲五城水又西

至成都入于江

南至小廣魏與梓潼合

小廣魏卽廣漢縣地王莽更名曰廣信也

梓潼水出其縣北界西南入于涪

故廣漢郡也公孫述改爲梓潼郡劉備嘉霍峻守
葭萌之功又分廣漢以北別爲梓潼郡以峻爲守
縣有五女蜀王遣五丁迎之至此見大蛇入山穴
五丁引之山崩壓五丁及五女因是山爲五婦山
又曰五婦候馳水所出一曰五婦水亦曰潼水也
其水導源南逕梓潼縣王莽改曰子同矣自縣西
逕涪城東又南入于涪水謂之五婦水口也

又西南至小廣魏縣南入于墊江

亦言涪水至北入漢水昔岑彭與臧宮自江州從
涪水上亦謂之爲內水也逕墊江公孫述令延岑
盛兵於沈水宮左步右騎夾船而進勢動山谷大
破岑軍斬首溺水者萬餘人水爲濁流沈水出廣
漢縣下入涪水也

涪水出漢中南縣東南旱山北至沔陽縣南入于沔
涪水卽黃水也東北流逕城固南城北城在山上
或言韓信始立或言張良創築未知定所制矣義

水經 卷之三十三
熙九年索遐為果州刺史自城固治此故謂之南城城周七里今澗帶谷絕壁百尋北谷口造城東門傍山尋澗五里有餘盤道登陟方得城治城北水舊有柝北渡泔水水北有趙軍城城北又有柝渡沔取北城城即大城固縣治也黃水右岍有悅歸館泔水歷其北北至沔陽左沔為三水口也

水經第三十二

水經第三十三

漢 桑欽撰

後魏酈道元注

明 吳中珩校

江水一

岷山在蜀郡氏道縣大江所出東南過其縣北

岷山即瀆山也水曰瀆水矣又謂之汶阜山在徼外江水所導也益州記曰大江泉源即今所聞始發羊膊嶺下緣崖散漫小大百數殆未濫觴矣東南下百餘里至白馬嶺而歷天彭關亦謂之為天

谷也秦昭王以李冰爲蜀守冰見氏道縣有天彭山兩山相對其形如闕謂之天彭門亦曰天彭闕江水自此已上至微弱所謂發源濫觴者也漢延平中岷山崩壅江水三日不流楊雄反離騷云自岷山投諸江流以弔屈原名曰反騷也

江水自天彭關東逕汶關而歷氏道縣北

漢武帝元封四年分蜀郡北部置汶山郡以統之縣本秦始皇置後爲昇遷縣也益州記曰自白馬嶺回行二千餘里至龍涸又八十里至西陵縣又南下六十里至石鏡又六十餘里而至北部始百許步又西百二十里至汶山故郡乃廣二百餘步又西南百八十里至濕坂江稍大矣故其精則芹絡纏曜江漢晒靈河圖括地象曰岷山之精上爲井絡帝以會昌神以建福故書曰岷山導江泉流深遠盛爲四瀆之首廣雅曰江貢也風俗通曰出珍物可貢獻釋名曰江共也小水流入其中所公共也東北百四十里曰岷山中江所出東注于大江岷山邛崃山也在漢嘉嚴道縣一曰新道南山有九折坂夏則凝冰冬則毒寒王子陽按轡處也平恒言是中江所出矣郭景純江賦曰流二江於

八經 卷之三十三
岨崓又東百五十里曰岨山北江所出東注于大江山海經曰岨山江水出焉東注大江其中多怪虵江水又逕汶江道汶出徼外嶧山西玉輪坂下而南行又東逕其縣而東注于大江故蘇代告楚曰蜀地之甲浮船於汶乘夏水而下江五日而至郢謂是水也

又有湔水入焉

水出綿道亦曰綿夷縣之玉壘山呂忱云一日半浣水也下注江

江水又東別爲沱

開明之所鑿也郭景純所謂玉壘作東別之標者也縣卽汶山郡治劉備之所置也渡江有笮橋

江水又歷都安縣

縣有桃關漢武帝祠李冰作大堰於此堰於江作壩壩有左右口謂之湔壩江入郫江檢江以行舟益州記曰江至都安堰其右檢其左其正流遂東郫江之右也因山頽水坐致竹木以漑諸郡又羊摩江灌江西於玉女房下作三石人於白沙郵郵在堰官上立水中刻要江神水竭不至足盛不沒要是以蜀人旱則藉以爲漑雨則不遏其流故記

曰水旱從人不知饑饉沃野千里世號陸海謂之天府也俗謂之都安之堰亦曰前堰又謂金隄左思蜀都賦云西踰金隄者也諸葛亮北征以此堰農大國之所資以征丁千二百人主護之有堰官益州刺史皇甫晏至都安屯觀坂從事何旅曰今所安營地名觀上夫在下其徵不祥不從果爲牙門張和所殺江水又逕臨邛縣王莽之監邛也縣有火井鹽水昏夜之時光興上照江水又逕江鄉縣王莽更名邛原也鄩江水出焉江水又東北逕郫縣下縣民有姚精者爲叛夷所殺掠其二女二

女見夢其兄當以明日自沈江中喪後日當至可伺候之果如所夢得二女之尸於水郡縣表異焉江水又東逕成都縣縣以漢武帝元鼎二年立縣有二江雙流郡下故楊子雲蜀都賦曰兩江珥其前者也風俗通曰秦昭王使李冰爲蜀守開成都兩江溉田萬頃神歲取童女二人爲婦冰以其女與神爲婚徑至神祠勸神酒酒杯恒澹澹冰厲聲以責之因忽不見良久有兩牛鬪於江岸傍有間冰還流汗謂官屬曰吾鬪疲極當相助也南向腰中正白者我綬也主簿刺殺北面者江神遂歿蜀

人慕其氣決凡壯健者因名冰兒也秦惠王二十七年遣張儀與司馬錯等滅蜀遂置蜀郡焉王莽改之曰導江也儀築成都以象咸陽晉太康中蜀郡爲王國更爲成都內史益州刺史治地理風俗記曰華陽黑水惟梁州漢武帝元朔二年改梁曰益州以新啓犍爲牂牁越雋州之疆壤益廣故稱益云初治廣漢之雒縣後乃徙此故李固與弟固書曰固今年五十七鬢髮已白所謂容身而遊滿腹而去周觀天下獨未見益州耳昔嚴夫子常言經有五涉其四州有九遊其八欲類此子矣初張

儀築城取上處去城十里因以養魚今萬頃池是也城北又有龍隄池城東有千秋池西有柳池西北有天井池津流徑通冬夏不竭西南兩江有七橋直西門鄆江冲里橋西南石牛門曰市橋矣漢入蜀自廣都令輕騎先往焚之橋下謂之石犀淵李冰昔作石犀五頭以厭水精穿石犀渠於南江命之曰犀牛里後轉犀牛二頭在頭中一頭在市橋一頭沈之於淵也大城南門曰江橋橋南曰萬里橋西上曰夷橋亦曰祚橋南岸道東有文學始文翁爲蜀守立講堂作石室於南城永初後學堂

水經 卷之三十三 五
遇火後守更增二石室後州奪郡學移夷里道西
故錦官也言錦工織錦則濯之江流而錦至鮮明
濯以佗江則錦色弱矣遂命之爲錦里也蜀有迴
復水江神嘗溺殺人文翁爲守祠之勸酒不盡拔
劔擊之遂不爲害江水東逕廣都縣漢武帝元朔
二年置王莽之就都亭也李冰識察水脉穿縣鹽
井江西有望穿鑿山渡水結諸陂池故盛養生之
饒卽南江也又從沖里橋北折曰長升橋城北十
里曰升遷有送客觀司馬相如將入長安題其門
曰不乘高車駟馬不過汝下也後入邛蜀果如志

焉李冰泂水造橋上應七宿故世祖謂吳漢曰安
軍宜在七橋連星間漢自廣都乘勝進逼成都與
其副劉尚南北相望夾江爲營浮橋相對公孫述
使謝豐揚軍市橋出漢後襲破漢墜馬落水緣馬
尾得出入壁命將夜潛渡江就尚擊豐斬之於是
水之陰江北則左對繁田文翁又穿湔洩以溉灌
繁田一千七百頃江水又東絕綿洛逕五城界至
廣都北岸南入于江謂之五城水口斯爲北江水
又東至南安爲壁玉津故左思云東越玉津也
又東南過犍爲武陽縣青衣水洙水從西南來合而

注之

縣故大夜郎國漢武帝開道置以爲縣太初四年益州刺史任安城武陽建元六年置王莽更名西順縣曰戢成光武謂之士大夫郡有鄴江入焉出江源縣首受大江東南流至武陽縣注于江縣下注上舊有大橋廣一里半謂之安漢橋水盛歲壞民苦治功後太守李嚴鑿大杜山尋江通道此橋遂廢縣有赤水下注江建安二十九年有黃龍見此水九日方去此縣藉江爲大堰開六水門用灌郡下北山昔者王喬所升之山也江水又與文井

江會李冰所導也自祚道與濛谿分水至蜀郡臨邛縣與布僕水合水出徼外成都西沈黎郡漢武元封四年以蜀都西部邛祚邛理旄牛道天漢四年置都尉主外羌在邛來山表自蜀西渡邛祚其至險有弄棟八渡之難揚毋閣路之岨水從縣西布僕來分爲二流一水逕其道又東逕臨邛縣入文井水文井水又東逕江都縣縣濱文井江江上有長隄隄跨四十里有未亭亭南有青城山山上有嘉穀山下有蹲鴟卽芋也所謂下有蹲鴟至老不饑卓氏之所以樂遠徙也文井江又東至武陽

縣天社山下入江其一水南逕越雋邛都縣西東南至雲南都之蜻蛉縣郡本雲山地也蜀建興三年置僕水又南逕永昌郡邪龍縣而與貪水合水蜻蛉縣上承蜻蛉水逕葉榆縣又東南至邪龍入于僕僕水又逕寧州建寧縣州故庾降都督屯故南入謂之屯下劉禪建興三年分益州郡置歷雙栢縣卽水入焉水出秦藏縣牛蘭山南流至雙栢縣東注僕水又東至來唯縣入勞水水出徼外東逕其縣與僕水合僕水東至交州交阯郡麓冷縣南流入于海江水自武陽東至彭亾聚昔岑彭與

吳漢沂江水入蜀軍次是地知而惡之會日暮不移遂爲刺客所害亦謂之平模水曰外水此地有彭冢言彭祖冢焉江水又東南逕南安縣西有熊耳峽連山競險接嶺爭高河平中山崩地震江水逆流縣溉有灘名壘坻亦曰監溉李冰所平地縣治青衣江會衿帶二水矣卽蜀王開明故治也來敏本蜀論曰荆人鼈令歿其尸隨水上荆人求之不得鼈令至汶山下邑復生起見望帝望帝者杜宇也從天下女子朱利自江源出爲宇妻遂王於蜀號曰望帝望帝立以爲相時巫山峽而蜀水不

流帝使鼈令鑿巫峽通水蜀得陸處望帝自以德不若遂以國禪號曰開明縣南有峨眉山有濛水卽大渡水也水發蒙漢東南流與泝水合水出徼外逕汶江道呂忱曰泝水出蜀許慎以爲泝水也從水我聲南至南安入大渡水大渡水又東入江故山海經曰濛水出漢陽西入江潏陽四

又東南過夔道縣北若水淹水合從西來注之又東注水北流注

縣本夔人居之地理風俗記曰夷中最仁有仁道故字施而秦紀謂夔僮之富也者其邑高后六年城之漢武帝感相如之言使縣令南通夔道費功無成唐蒙南入斬之乃鑿石開閣以通南中迄于建寧二千餘里山道廣丈餘深三四丈其塹之迹猶存王莽更曰夔治也山多猶猢以猴而短足好遊巖樹一騰百步或三百丈順往倒返乘空若飛縣有蜀王兵蘭其神作大難江中崖峻岨險不可穿鑿李冰乃積薪燒之故其處縣巖猶有赤白玄黃五色焉赤白照水玄黃從焚來至此而止言畏崖嶼不更上也益部耆舊傳曰張員妻黃氏女也名帛員乘船覆沒求尸不得帛至沒處灘頭仰天

而歎遂自沈淵積十四日帛持員手於灘下出時
人爲說曰符有光洛焚道有張帛者也

江水又與符里水合

水出寧州南廣郡南廣縣故犍爲之屬縣也漢
武帝太初元年置劉禪延熙中分以爲郡導源汾
關山北水流有大步水注之出南廣縣北流注符
里水又北逕熨道入江謂之南廣口渚水則未聞
也

又東過江陽縣南洛水從三危山東過廣魏洛陽南
東南注之

洛水出洛縣漳山亦言出梓潼縣栢山山海經曰
三危在燉煌南與嶧山相接山南帶黑水又山海
經不言洛水所道經曰出三危山所未詳常璩云
李冰道洛通山水流發暴口逕什邡縣漢高帝六
年封雍齒爲侯國王莽更名曰美信縣也洛水又
南逕洛縣故城南廣漢郡治也漢高帝之爲漢王
也發巴渝之士北定三秦六年乃分巴蜀置廣漢
郡於乘鄉王莽之就信縣曰吾雒也漢安帝永初
二年移治涪城後洛縣先是洛縣城南每陰雨常
有哭聲聞於府中積數十年沛國陳寵爲守以亂

世多歿亾暴骸不葬故也乃悉收葬之哭聲遂絕
劉備自將攻之龐士元中流矢歿於此益州舊以
蜀郡廣漢犍爲三蜀土地沃美人士雋又爲一州
稱望縣有沈鄉去江七里江士遊之所居詩至孝
母好飲江水嗜魚膾常以雞鳴遡流汲江子坐取
水溺歿婦恐姑知稱詩遊學冬夏衣服實投江流
於是至孝上通洞泉泉出其舍側而有江之甘焉
詩有田濱江澤鹵泉流所溉盡爲沃野又湧泉之
中旦旦常出鯉魚一雙以膳焉可謂孝悌發於方
寸徽美著於無窮者也洛水又南逕新都縣蜀有
三都謂成都廣都此其一焉與綿水合水西出綿
竹縣又與湔水合亦謂之郫江也又言是洛水呂
忱曰一曰湔然此二水俱與洛會矣又逕犍爲牛
鞞水昔羅尚乘牛鞞水東征李雄謂此水也縣以
漢武帝元封二年置又東逕資中縣又逕安漢縣
謂之綿水也自上諸縣咸以溉灌故語曰綿洛爲
沒沃也綿水至江陽縣方山下入江謂之綿水口
曰中水江陽縣枕帶雙流據江洛會也漢景帝六
年封趙相蘇嘉爲侯國江中有大門小門焉季秋
之月則黃鱗魚歿漚也昔世祖微時過江陽縣有

一子望氣者言江陽有貴兒象王莽求之而撩煞
之後世祖怨爲子立祠於縣謫其民罰布數世楊
雄琴清英曰尹吉甫子伯竒至孝後母譖之自投
江中衣苔帶藻忽夢見水仙賜其美藥惟養親揚
聲悲歌船人聞之而學之吉甫聞船人之聲疑似
伯竒援琴作子安之操

江水逕漢安縣北

縣雖迫山川土地特美蠶魚鹽家有焉江陽郡治
也故犍爲岐江都尉建安十八年劉璋立

江水東逕樊石灘又逕大附灘

頻歷二險也

又東過符縣北邪東南鰓部水從符關東北注之
縣故巴夷之地也漢武帝建初六年以唐蒙爲中
郎將從萬人出巴符關者也漢武元鼎二年立王
莽之符信矣縣治安樂水會水源南通寧州平夷
郡鼈縣北逕安縣界之東又逕符縣下北入江縣
長趙祉遣吏光尼和以永建元年十一月詣巴郡
沒歿成濡灘子賢求喪不得女終年二十五歲有
二子五歲以還至二年二月十五日尚不得喪終
乃乘小船至父沒處哀哭自沈見夢告賢曰至二

十一日與父俱出至日父子果浮出江上郡縣上言爲之立碑以旌孝誠也其鰥部之水所未聞矣或是水之殊目非所究也

又東北至巴郡江州縣東强水涪水漢水白水宕渠水水合南流注之

强水卽羌水也宕渠水卽潛水渝水矣巴水出晉昌郡宣漢縣巴嶺山郡隸梁州晉太康中立治漢中縣南去郡八百餘里故蜀巴西南流歷巴中逕巴郡故城南李嚴所築大城北西南入江庾仲雍所謂江州縣對二水口右則涪內水左則蜀外水

卽是水也江州縣故巴子之都也春秋桓公九年巴子使韓服告楚請與鄧好是也及七國稱王巴亦王焉秦惠王遣張儀等救苴侯於巴儀貪巴苴之富因執其王以歸以置巴郡焉巴治江州漢獻帝初平元年分巴爲三郡於江州則永寧郡治也至建安六年劉璋納騫涌之訟復爲巴郡以嚴顏爲守顏見先主入蜀歎曰獨坐窮山放虎自衛此卽拊心處巴漢世郡治江州巴水北北府城是也後乃徙南城劉備初以江夏費觀爲太守領江州都督後都護李嚴更城周一十六里造倉龍白虎

門夾以五郡爲巴州治丞相諸葛亮不許競不果
地勢側嶮皆重屋累居數有火害又不相容結舫
水居者五百餘家承三江之會夏水增盛壞散顛
沒歿者無數縣有官楠官荔芟園夏至則熟二千
石常設厨膳命士大夫共會樹下食之縣北有稻
田出御米也縣下又有清水穴巴人以此水爲粉
則皜曜鮮芳貢粉京師因名粉水故世謂之爲江
州墮林粉粉水亦謂之爲立水矣江水北岍有塗
山南有夏禹廟塗君祠廟銘存焉常璩仲雍並言
禹娶於此余按羣書咸言禹娶在壽春當塗不於
此也

又江水東至枳縣西延江從犍犍郡北流西屈注之
東逕陽關巴子梁江之兩岍猶有梁處巴之三關
斯爲一也延熙中蜀車騎將軍鄧芝爲江州都督
治此江水又東右逕黃葛峽山高嶮今無人居江
水又左逕明月峽東至梨鄉歷雞鳴峽江之兩岸
有枳縣治華陽記曰枳縣在江州巴郡東四百里
治涪陵水會庾仲雍所謂有別江出武陵者也水
乃延江之枝津分水北注逕涪陵入江故亦云涪
陵水也其水南道武陵郡昔司馬錯泝舟此水取

水經 卷之三十三
楚黔中地延熙中鄧芝伐徐巨射玄後於是縣獲
自拔矢卷木葉塞射瘡芝歎曰傷物之生吾其歎
矣江水又東逕涪陵故郡北後乃并巴郡遂罷省
江又東逕文陽灘險難上江水又東逕漢平二
百餘里左自涪陵東出百餘里而屈于積石東爲

桐柱灘

又逕東望峽東歷平都

峽對豐民洲舊巴子別都也華陽記曰巴子雖都
江平州又治平都卽此處也有平都縣爲巴郡之
隸邑矣縣有天師治兼建佛寺其清靈縣有市肆

四日一會

江水又逕虎鬚灘

灘水廣大夏斷行旅

江水又東逕臨江縣南

王莽之鹽江縣也華陽記曰縣在枳東四百里東
接胸忍縣有鹽官自縣北入鹽井谿有鹽井管戶
谿注谿井水

江水又東得黃華水口

江浦也

左逕石城南

水經

卷之三十三

七

庾仲雍曰臨江至石城黃華口一百里

又東至平洲

洲上多居民

又東逕壤塗而歷和灘又東逕界壇

是地巴東之西界益州之東境故得是名也又東過魚復縣南夷水出焉

江水又東右得將龜谿口

華陽記曰胸忍縣出靈龜咸熙元年獻龜於相府言出自此谿也

江水又東南會北集渠

二谿水涪陵縣界謂之于陽谿北流逕巴東郡之南浦僑縣西谿夾側鹽井三口相去各數十步以木爲桶徑五尺修煮不絕水北流注於江謂之南集渠口亦曰于陽谿口北水出新浦縣北高梁山分谿南水逕其縣西又南一百里入胸忍縣南入于江謂之北集渠口別名班口又曰分水口胸忍尉治此

江水又右逕池谿口

蓋江汜決入也

江水又東逕右龍

水至于博陽二村之間有盤石廣四百丈長六里而復殆于咀塞江川夏沒冬出基亘通渚

又東逕羊腸虎臂灘

楊亮爲益州至此舟覆徵其波瀾蜀人至今猶名之爲使君灘

江水又東彭水注之

水出巴渠郡獠中東南流逕漢豐縣東清水注之水道源出西北巴渠縣東北巴嶺南獠中卽巴渠水也西南流至其縣又西入峽檀井谿水出焉又西過山至漢豐縣東而西注彭谿謂之清水口彭谿又入逕胸忍縣西六十里南流至于江謂之彭谿口

江水又東右逕胸忍縣故城南

常璩曰縣在巴東郡西二百九十里縣治故城跨其山阪南臨大江之南岍有方山山形方峭枕側

江濱

江水又東逕瞿巫灘

卽下瞿灘也又謂之博望灘左則湯谿水注之水源出縣北六百餘里上庸界南流歷之縣翼帶鹽井一百所巴川資以自給粒大者方寸中央隆起

形如張傘故因名之曰傘子鹽有不成者形亦必
方異於常鹽矣王隱晉書地道記曰入湯口四十
三里有石煮以爲鹽石大者如升小者如拳煮之
水竭鹽成蓋蜀火井之倫水火相得乃佳矣湯谿
下與檀谿水合上承巴渠水巴渠南歷檀井谿之
檀井下水入湯水湯水又南入于江名曰湯口

江水又逕東陽灘

江上有破石故亦通謂之破石灘荀延光沒處也
常璩曰水道有東陽下瞿數灘山有大小石城靈
壽木及橘圃也故地理志曰縣有橘官有民市

江水又逕魚復縣之故陵

舊郡治故陵谿西二里故陵村谿卽永谷也地多
木瓜樹有子大如甌白黃實甚芬香爾雅之所謂
楸也

江水又東爲落牛灘逕故陵北

江側有六大墳庾仲雍曰楚都丹陽所葬亦猶枳
之巴陵矣故以故陵爲名也有魚復尉戍此江之
左岍有巴鄉村村人善釀故俗稱巴鄉清郡出名
酒村側有谿谿中多靈壽木中有魚其頭似羊豐
肉少骨美於餘魚谿水伏流逕平頭山內通南浦

水經 卷之三十三
故縣陂湖其地平曠有湖澤中有菱芡鯽鴈不異
外江凡此等物皆入峽所無地密惡蠻不可輕至
江水又右逕夜清而東歷朝陽道口

有縣治治下有市十日一會

江水又東左逕新市里南

常璩曰巴舊立市於江上今新市里是也

江水又東右合陽元水口

水口出陽縣西南高陽山東東北流逕其縣南東
北流丙水注之水發縣東南柏枝山山下有丙穴
穴方數丈中嘉魚常以春末遊渚冬初入穴抑亦

襄漢丙穴之類也其水北流入高陽谿谿水又東

北流注於江謂之陽元水口

江水又東逕南鄉峽東逕永安宮南

劉備終於此諸葛亮受遺處也其間平地可二十
許里江山迥濶入峽所無城周十餘里背山面江
頽墉四毀荆棘成林左右民多墾其中

江水又東逕諸葛亮圖壘南

石磧平曠望兼川陸有亮所造八陣圖東跨故壘
皆累細石爲之自壘西去聚石八行行間相去二
丈因曰八陣旣成自今行師庶不覆敗昔圖兵勢

行藏之權自後深識者所不能了今夏水漂蕩歲月消損高處可二三尺下處磨滅殆盡

江水又東南逕赤岬西

是公孫述所造因山據勢周迴七里一百四十步東高二百丈西北高一千丈南連基白帝山甚高大不生樹木其石悉赤土人云如人袒胛故謂之赤岬山淮南子曰傍惶於山岬之旁注曰岬山脅也郭仲產曰斯名將因此而興矣

江水又東逕魚復縣故城南

故魚國也春秋左傳文公十六年庸與羣蠻叛楚莊王伐之七遇皆北唯裨儵魚人逐之是也地理志江關都尉治公孫述名之爲白帝取其王巴蜀章武二年劉備爲吳所破改白帝爲永安巴東郡治也漢獻帝初平元年分巴爲三都以魚復爲故陵郡趙胤訴劉璋改爲巴東郡治白帝山城周迴二百八十步北緣馬嶺接赤岬山其間平處南北相去八十五丈東西十七丈又東傍東瀼谿卽以爲隍西南臨大江關之眩目唯馬嶺小差委迤猶斬爲路羊腸數四然後得上益州刺史鮑陋鎮此爲譙道福所圍城裏無泉乃南開水門鑿石爲函

道上施木天公直下至江中有似猿臂相牽引汲
然後得水水門之西江中有孤石爲淫預石冬出
水二十餘丈夏則沒亦有栽處矣縣有夷谿卽狼
山清江也經所謂夷水出焉

江水又東逕廣谿峽

斯乃三峽首也其間三十里頽巖倚木厥勢殆交
北岍山上有神淵淵北有白鹽崖高可千餘丈俯
臨神淵土人見其高白故因名之天旱燃木崖上
推其灰燼下穢淵中尋則降雨常據曰縣有山也
清水又東南逕士林東戍名也戍有邸閣水左有
豫章大陂下灌良疇三千許頃也

西過鄧縣東江水自關東逕弱關捍關

縣故鄧侯吾離之國也楚文王滅之秦以爲縣清
水右合濁水俗謂之弱溝水上承白水於朝陽縣
東南流逕鄧縣故城南習鑿齒襄陽記曰楚王至
鄧之濁水去襄陽二十里卽此水也濁水又東逕
鄧塞者卽鄧城東南小山也先後名之爲鄧塞昔
孫文臺破黃祖於其下濁水東流注于涓涓水又
南逕鄧塞東又逕鄧城東古鄧子國也蓋鄧之南
鄙也昔巴子請楚與鄧爲好鄧人奪其幣卽是邑

也司馬彪以爲鄧之鄼聚矣

南入于沔瀝水出瀝強縣南澤中東入潁

瀝水出潁川陽城縣少室山東流注于潁水而亂
流東南逕臨潁縣西北小瀝水出焉東逕臨潁縣
故城北瀝水入東逕瀝陽城北又東逕瀝強縣故
城南建武元年世祖封揚化將軍堅鐔爲侯國瀝
水東爲陶樞陂余案瀝陽城在瀝水南然則此城
正應爲瀝陰城而有瀝陽之名者明在南猶有瀝
水故此城以陽爲名矣潁水之南有二瀆其南瀆
東南流行歷臨潁亭西東南入汝今無水也疑卽

瀝水之故瀆矣汝水於竒雜城兵別東派時人謂
澤水神旱時鳴鼓請雨則必應嘉澤蜀都賦所謂
應鳴鼓而興雨也峽中有瞿塘黃龍二灘夏水迴
復泝沂所忌瞿塘灘上有神廟尤至靈驗刺史二
千石逕過皆不得鳴角伐鼓商旅上水恐觸石有
聲乃以布裹篙足今則不能爾猶饗薦不輟此峽
多獐獐不生北岸非唯一處或有取之放著北山
中初不聞聲將同貉獸渡汶而不生矣其峽蓋自
昔禹鑿以通江郭景純所謂巴東之峽夏后疏鑿
者又東出江關入南郡界

水經卷之二十四
江水自關東逕弱關捍關

捍關廩君浮夷水所置也弱關在建平秭歸界昔巴楚數相攻伐藉險置關以相防捍秦兼天下置立南郡自巫上皆其城也又東過巫縣南鹽水從縣東南注流之

江水入東烏飛水注之

水出天門郡淩中縣界北流逕建平郡沙渠縣南又北流逕巫縣南西北歷山道三百七十里注于江謂之烏飛口

水經第三十三

水經第三十四

漢 桑 欽撰

後魏 酈道元注

明 吳中珩校

江水二

江水又東逕巫縣故城南

縣故楚之巫郡也秦省郡立縣以隸南郡吳孫休分爲建平郡治巫城城緣山爲墉周十二里一百一十步東西北三面皆帶傍深谷南臨大江故謂之夔國也

江水又東巫溪水注之

溪水道源梁州晉興郡之宣漢縣東入南逕建平郡秦昌縣南又逕北井縣西東轉歷其縣北井南有鹽井井在縣北故縣名北井建平一郡之所資也鹽水下通巫溪溪水是兼鹽水之稱矣溪水又南屈逕巫縣東縣之東北三百步有聖泉謂之孔子泉其水飛清潔石穴並高泉下注溪水溪水又南入于大江

江水又東逕巫峽

杜宇所鑿以通江水也郭仲產云按地理志巫山在縣西南而今縣東有巫山將郡縣居治無恒故也

江水歷峽東逕新崩灘

此山漢和帝永元十三年崩晉太元二年又崩當崩之日水逆流百餘里湧起數十丈今灘上有石或圓如葦或方似屋若此者甚衆皆崩崖所隕致怒湍流故謂之新崩灘其頽巖所餘北之諸嶺尚爲竦桀其下十餘里有大巫山非唯三峽所無乃當抗峯岷峨偕嶺衡疑其翼附群山並槩青雲更就霄漢辨其優劣耳神血涂所處山海經曰夏后

啓之臣曰血涂是司神于巴巴人訟于血涂之所
其衣有血者執之是請生居山上 在丹山

西丹山在丹陽屬巴丹山西卽巫山者也又帝女
居焉宋玉所謂天帝之季女名曰瑤姬未行而亡
封于巫山之臺精魂爲草寔爲靈芝所謂巫山之
女高唐之姬旦爲行雲暮爲行雨朝朝暮暮隄臺
之下旦早視之果如其言故爲立廟號朝雲焉其
間首尾一百六十里謂之巫峽蓋因山爲名也自
三峽七百里中兩岸連山略無闕處重巖疊嶂隱
天蔽日自非停午夜分不見曦月至於夏水襄陵

沿泝阻絕于命急宣有時朝發白帝暮到江陵其
間千二百里雖乘奔御風不以疾也春冬之時則
素湍淥潭迴清倒影絕巘多生檉栢懸泉瀑布飛
漱其間清榮峻茂良多趣味每至晴初霜旦林寒
澗肅常有高猿長嘯屢引淒異空谷傳響哀轉久
絕故漁者歌曰巴東三峽巫峽長猿鳴三聲淚沾
裳

江水又東逕石門灘

灘北岸有山山上合下開洞達東西緣江步路所
由劉備爲陸遜所破是逕此門追者甚急備乃燒

斷鎧道孫桓爲遜前驅奮不顧命斬上夔道截其
要徑備踰山越嶮僅乃得免忿恚而歎曰吾昔至
京桓尚小兒而今迫孤乃至於此遂發憤而薨矣
又東過秭歸縣之南

縣故歸鄉地理志曰歸子國也樂緯曰昔歸典叶
聲律宋忠曰歸卽夔歸鄉蓋夔鄉矣古楚之嫡嗣
有熊摯者以癘疾不立而居于夔爲楚附庸後王
命爲夔子春秋僖公二十六年楚以其不祀滅之
者也表崧曰屈原有賢姊聞原放逐亦來歸喻令
自寬全鄉人冀其見從因名曰秭歸卽離騷所謂
女嬃嬋媛以詈余也縣城東北依山卽坂周迴二
里高一丈五尺南臨大江古老相傳謂之劉備城
蓋備征吳所築也縣東北數十里有屈原舊田宅
雖畦堰縻漫猶保屈田之稱也縣北一百六十里
有屈原故宅累石爲屋基名其地曰樂平里宅之
東北六十里有女嬃廟擣衣石猶存故宜都記曰秭
歸蓋楚子熊繹之始國而屈原之鄉里也屈原宅
于今具存指謂此也

江水又東逕城北

其城憑嶺作固二百一十步夾溪臨谷據山枕江

水經 卷之三十四
北對丹陽城城據山跨阜周八里二百八十步東
北兩面悉臨絕澗西帶亭下溪南枕大江嶮峭壁
立信天固也楚子楚熊繹始封丹陽之所都也地
理志以爲吳子之丹陽論者云尋吳楚悠隔縵縷
荆山無容遠在吳境是爲非也又楚子先王陵墓
在其間蓋爲徵矣

江水又東南逕夔城南

跨據川阜周迴一里百一十八步西北皆枕深谷
東帶鄉溪南側大江城內西北角有金城東北角
有員土獄西南角有石井口徑五尺熊摯始治巫
城後疾移北蓋夔徙也春秋左傳僖公二十六年
楚令尹子玉城夔者也服虔曰在巫之陽秭歸歸
鄉矣

江水又東逕歸鄉縣故城北

袁崧曰父老傳言原旣流放忽然暫歸鄉人喜悅
因名曰歸鄉抑其山秀水清故出雋異地嶽流疾
故其性亦隘詩云惟岳降神生甫及申信與余謂
袁崧此言可謂因事而立證恐非名縣之本旨矣
縣城南面重嶺北背大江東帶鄉口溪溪源出縣
東南數百里西北入縣逕狗峽西峽崖龕中石隱

起有狗形形狀具足故以狗名峽鄉口溪又西北
逕縣下入江謂之鄉口也

江水又東逕信陵縣南

臨大江東傍深溪溪源北發梁州上庸縣界南流
逕縣下而注于大江也

江水又東過夷陵縣南

江水自建平至東界峽盛弘之謂空冷峽峽甚高
峻卽宜都建平二郡界也其間遠望交嶺表有五
六峰參差互出上有奇石如二人像攘袂相對俗
傳兩郡督郵爭界於此宜都督郵厥勢小東傾議
者以爲不如也

江水歷峽東逕宜昌縣之埽窰下

江之左岸絕岸壁立數百丈飛鳥所不能棲有一
火爐埽在崖間望見可長數尺父老傳言昔洪水
之時人薄丹崖側以餘燼埽之巖側至今猶存故
先後相承謂之埽窰也

江水又東流頭灘

其水並浚激奔暴魚鼈所不能游行者常苦之其
歌曰灘頭白勃堅相持倏忽淪沒別無期袁崧曰
自蜀至此五千餘里下水五日上水百日也

江水又東逕宜昌縣北

分夷道狼山所立也縣治江之南岸北枕大江與夷陵對界宜都記曰渡流頭灘十里便得宜昌縣也

江水又東逕狼尾灘而歷人灘

袁崧曰二灘相去二里人灘水至峻峭南岸有青石夏沒冬出其石嶽峯數十步中悉作人面形或大或小其分明者鬚髮皆具因名曰人灘也

江水又東逕黃牛山

下有灘名曰黃牛灘南岸重嶺疊起最外高崖間有色如人負刀牽牛人黑牛黃成就分明既人跡所絕莫得究焉此巖既高加江湍紆迴雖途逕信宿猶望見此物故行者謠曰朝發黃牛暮宿黃牛言水路行深迴望如一矣

江水又東逕西陵峽

宜都記曰自黃牛灘東入西陵界至峽口一百許里山水紆曲而兩岸高山重嶂非日中夜半不見日月絕壁或千許丈其石彩色形容多所像類林木高茂略盡冬春猿鳴至清山谷傳響泠泠不絕所謂三峽此其一也崧言常聞峽中水疾書記及

水經 卷之三十四
口傳悉以臨懼相戒曾無稱有山水之美也及余
來踐躋此意既至欣然始信之耳聞不如親見矣
其壘嶸秀峰竒構異形固難以辭敘林木蕭森離
離蔚蔚乃在霞氣之表仰矚俯映彌習彌流連信
宿不覺忘返目所履歷未嘗有也既自欣得此竒
觀山水有靈亦當警知已於古矣

江水歷禹斷江

南峽北有北谷村兩山間有水清深潭而不流又
耆舊傳言昔是大江及禹治水此江小不足瀉水
禹更開今峽口水勢并衝此江遂絕于今謂之斷
江也

江水出峽東南流逕城故州

州附北岸洲頭曰郭洲長二里廣一里上有步闡
故城方圓稱洲周廻略滿故城洲上城周里吳西
陵督步騭所築也孫皓鳳皇元年騭息闡復爲西
陵督據此城降晉遣太傅羊祜接援未至爲陸抗
所陷也

江水又東逕故城北

所謂陸抗城也城卽此爲墉四面大險江南岸有
山孤秀從江中仰望壁立峻絕袁崧爲郡嘗登之

矚望焉故其記云今自山南上至其嶺嶺容十許人四面望諸山略盡其勢俯臨大江如縈帶焉視舟如鳧鴈矣北對夷陵縣之故城城南臨大江秦令白起伐楚三戰而燒夷陵者也應劭曰夷山在西北蓋因山以名縣也王莽改曰居利吳黃武元年更名西陵也後復夷陵縣北三十里有石穴名白馬穿嘗有白馬出穴食人逐之入穴潛行出漢中漢中人失馬亦嘗出此穴相去數千里袁崧言江北多連山登之望江南諸山數十百重莫識其名高者千仞多奇形異勢自非煙寒雨霽不辨見此遠山矣余嘗往返十許過正可再見遠峰耳

江水又東逕白鹿巖

沿江有峻壁百餘丈猿所不能遊有一白鹿陵峭登崖乘巖而上故世名此巖爲白鹿云

江水又東歷荆門虎牙之門

荆門在南上合下開閭徹山南有門像虎牙在此石壁色紅間有白文類牙形並以物像受名此三山楚之西塞也水勢急峻故郭景純江賦曰虎牙桀豎以屹萃荆門闢竦而盤薄圖淵九迴以懸騰溢流雷响而電激者也漢建武十一年公孫述遣

水經 卷之三十四
其大司徒任滿翼江王田戎將兵萬據嶮爲浮橋
橫江以絕水路營壘跨山以塞陸道光武遣吳漢
岑彭將六萬人擊荆門漢等率舟師攻之直衝浮
橋因風縱火遂斬滿等矣

又東南過夷道縣北夷水從狼山縣南東北注之
夷道縣漢武帝伐西夷路由此出故曰夷道矣王
莽更名江湖桓温父名彝改曰西道魏武臨江分
南郡置臨江郡劉備曰宜都郡治在縣東四百步
故城吳丞相陸遜所築也爲二江之會也北有湖
里淵淵上橘柚蔽野桑麻閭日西望狼山諸嶺重
峰疊秀青翠相臨時有丹霞白雲遊曳其上城東
北有望堂地特峻下臨青江遊矚之名處也縣北
有女觀山厥處高顯回眺極目古老傳言昔有思
婦夫官於蜀屢愆歸期登此山絕望憂感而歿山
木枯悴鞠爲童枯鄉人哀之因名此山爲女觀焉
葵之山頂今孤墳尚存矣又東過枝江縣南沮水
從北來注之

江水又東逕上明城北

北晉大元中苻堅之寇荊州也刺史栢冲徙渡江
南使劉波築之移州治城也其地夷敞北據大江

江汜枝分東入大江縣治州上故以枝江爲稱地理志曰江沱出西南東入江是也其民古羅徙羅故居宜城西山楚文王又徙之於長沙今羅縣是矣縣西三里有津鄉津鄉里名也春秋莊公十九年巴人伐楚楚子禦之大敗於津鄉應劭曰南郡江陵有津鄉今則無聞矣郭仲產云尋楚禦巴人枝江是其塗便此津鄉縣卽其地也盛弘之曰縣舊治沮中後移出百里洲西去郡一百六十里縣左右有數十洲槃布洲中其百里洲最爲大也中桑田甘果映江依洲自縣西至上明東及江津其中更有九十九洲楚諺云洲下石故不出王者相玄有開鼎之志乃漕一洲以充百數僭號數旬宗滅身屠及其傾敗洲亦消毀今上在西忽有一洲自生沙流迴薄成不淹時其後未幾龍飛江漢矣縣東二里有縣人劉凝之故宅凝之字志安兄盛公高尚不仕凝之慕老萊嚴子陵之爲人立屋江湖非力不食妻梁州刺史郭全女亦能安貧宋元嘉中夫妻隱于衡山終焉不返矣縣東北十里土臺北岸有迤洲長十餘里義熙初武烈王斬桓謙處縣東南二十里富城洲上有道士范儕精廬自言

巴東人少遊荆土而多盤桓縣界惡衣麤食蕭散自得言來事多驗而辭不可詳人心欲見歛然而對貌言尋求終弗遇也雖逕跨諸洲而舟人未嘗見其濟涉也後東遊廣陵卒於彼土儕本洲無定止處宿憇一小巷而已弟子慕之於其昔遊共立精舍以存其人縣有陳留王子香廟頌子香於漢和帝之時出爲荊州刺史有惠政天子徵之道卒枝江亭中常有三白虎出入人間送喪踰境百姓追美甘棠以永元十八年立廟設祠刻石銘德號曰枝江白虎王君其子孫世令猶謂之爲白虎王

江水又東會沮口

楚昭所謂江漢沮漳楚之望也

又南過江陵縣南

縣江有洲號曰枝迴洲江水自此兩分而爲南北江也北江有故鄉洲元興之末栢玄西奔毛祐之與參軍費恬射玄於此洲玄子昇年六歲輒拔去之王昭之云玄之初奔也經日不得食左右進麤粥咽不下昇抱玄曾撫之玄悲不自勝至此益州都護馮遷斬玄於此州斬昇於江陵矣下有龍洲洲東有龍洲二淵之間世擅多魚矣漁者投罟歷

網往往繼絕有潛客泳而視之見水下有兩石牛嘗爲罾害矣故漁者莫不擊浪浮舟鼓枻而去矣其下謂之邴里洲洲有高沙湖湖東北有小水通江名曰曾口

江水又東逕鸞尾洲

北合靈溪水水無泉源上承散水合成大溪南流注江江溪之會有靈溪戍背阿面江西帶靈溪故戍得其名矣

江水東得馬牧口

江水斷洲通會

江水又東逕江陵縣故城南

禹貢荆及衡陽惟荊州蓋卽荆山之稱而制州名矣故楚也子革曰我先君僻處荆山以供王事遂遷紀郢今城楚船官地也春秋之渚宮矣秦昭襄王二十九年使白起拔鄢郢以漢南地而置南郡焉周書曰南國名也南氏有二臣力鈞勢敵競進爭權君弗能制南氏用分爲二南國也按韓嬰敘詩云其地在南郡南陽之間呂氏春秋所謂禹自塗山南省南土者也是郡取名焉後漢景帝以爲臨江王榮國王坐侵廟垣地爲宮被徵升車出北

門而軸折父老竊流涕曰吾王不還矣自後北門
不開蓋由榮非理終也漢景帝二年改爲江陵縣
王莽更名南順縣曰江陵舊城關羽所築羽北圍
曹仁呂蒙襲而據之羽曰此城吾所築不可攻也
乃引而退杜元凱之攻江陵也城上人以瓠繫狗
頸示之元凱病瘦故也及城陷殺城中老小血流
沾足論者以此薄之江陵城地東南傾故緣以金
隄自靈溪始栢温令陳遵造遵善於防攻使人打
鼓遠聽之知地勢高下依傍創築略無差矣城西
有栖霞樓俯臨通隍吐納江流城南有馬牧城西
側馬逕此洲始自牧迴下迄於此長七十餘里洲
上有奉城故江津長所治舊主度州郡貢於洛陽
因謂之奉城亦曰江津戍也戍南對馬頭岸昔陸
抗屯此與羊祜相對大弘信義談者以爲華元子
反復見於今矣北對大岸謂之江津口故洲亦取
名焉江水自此始也家語曰江水至江津北方舟
避風不可涉也故郭景純云濟江津以起漲言其
深廣也

江水又東逕郢城南

子囊遺言所築城也地理志曰楚別邑故郢矣王

水經卷之二十四
莽以爲郢亭城中有趙臺卿冢岐平生自所營也
冢圖賓主之容用存情好敘其宿尚矣

江水又東得豫章口

夏水所通也西北有豫章岡蓋因岡而得名矣或
言因楚王豫章臺名所未詳也

水經第三十四

水經第三十五

漢 桑 欽 撰

後魏 酈道元 注

明 吳中珩 校

江水三

又東至華容縣西夏水出焉

江水左迤爲中夏水右則中郎浦出焉江浦右迤
南派曲而極水曲之地勢世謂之江曲者也

又東南當華容縣南湧水出焉

江水又東涌水注之

水自夏水南通於江謂之涌口春秋所謂閭敖游涌而逸於二水之間者也

江水又逕南平郡孱陵縣之樂鄉城北

吳陸抗所築後王濬攻之獲吳水軍督陸景於此渚也

又東南油水從西南來注之又東右合油口

又東逕公安縣北

劉備之奔江陵使築而鎮之曹公聞孫權以荊州借備臨書落筆杜預克定江南罷華容置之謂之江安縣南郡治矣以華容之南鄉爲南郡晉太康元年改曰南平也縣有油水水東有景口口卽武陵郡界景口東有淪口淪水南與景水合又南通澧水及諸陂湖北是淵也相接悉是南蠻府屯也故側江有大城相承云倉諸城卽卽閣也

江水左會高口

江浦也對黃州

江水又東得故市口

水與高水通也

江水又右逕楊歧北山

山抗大江山東有城故華容縣尉舊治也

大江又東左合子夏口

江水左迤北出通於夏水故曰子夏也

大江又東左得侯臺水口

江浦也

大江右得龍穴水口

江浦右迤也北對虎洲又洲北有龍巢地名也昔禹南濟江黃龍夾舟舟人五色無主禹笑曰吾受命於天竭力養民生歟命也何憂龍哉於是龍一龍弭鱗掉尾而去焉故水地取名矣

江水自龍巢而東俞口

夏水泛盛則有冬無之江水北岸上有小城故監

又縣尉治也

又東得清揚土塢二口

江浦也

大江右逕石首山北又東逕赭要

赭要洲名在大江中次北湖洲下

江水左得飯筐上口

秋夏水通下口間相距三十餘里赭要下即楊子洲在大江中二洲之間常苦蛟害者荆飲飛濟此遇兩蛟斬之自後罕有所患矣江之右岸則溝水

口口上卽錢官也水自牛皮山東北通江北對清
水洲洲下接生江洲南卽生江口水南通澧浦江
水右會飯筐上口江浦所入也

江水又右得上檀浦

江澁也

江水又東逕竹畦南

江中有觀詳澁澁東有大洲洲東分爲爵洲洲南
對湘江口也

又東至長沙下雋縣北澧水沅水資水合東流注之
凡此諸水皆注于洞庭之陂是乃湘水非江川也

湘水從南來注之

江水右會湘水所謂江水會者也

江水又東左得二夏浦

夏浦俗謂之西江口又東逕忌置山南山東卽隱
口浦矣江之右岸有城陵山山有故城東接微落
山亦曰暉落磯江之南畔名黃金瀨瀨東有黃金
浦良父口夏浦也

又東逕彭城口

水有東彭城嶼故水受其名卽玉潤水出巴丘縣
東玉山玉溪北流注于江

江水自彭城巖東逕如山北

北對隱巖二巖之間大江之中有獨石孤立大江中山東江浦世謂之白馬口

江水又左逕白螺山南

右歷鴨蘭巖北江中也東得鴨蘭治浦二口夏浦也

江水左逕止烏林南

村居地名也又東逕烏黎口江浦也卽中烏林矣又東逕烏林南吳黃蓋敗魏武於烏林卽是處也江水又東左得子練口

北通練浦又東合練口江浦也南直練洲練名所以生也江之右岸得蒲磯口卽陸口也水出下雋縣西三山溪其水東逕陸城北又東逕下雋縣南故長沙舊縣王莽之閩雋也宋元嘉十六年割隸巴陵郡陸水又屈而西北流又逕其縣北北對金城吳將陸渙所屯也陸水又入蒲圻縣北逕呂蒙城西昔孫權征長沙零桂所鎮也陸水又逕蒲巖山北入大江謂之刁環口又東逕蒲巖山北對蒲圻洲亦曰擎洲又曰南洲洲頭卽蒲圻縣治也晉太康元年置洲上有白面洲洲南又有滌口水出

豫章又縣東入蒲圻縣至沙陽西北魚嶽山入江山在大江中楊子洲南孤峙中洲

江水左得中陽水口又東得白沙口

一名沙屯卽麻屯口也本名蔑默口江浦矣南直蒲圻洲水北入百餘里吳所屯也又逕魚嶽山北下得金梁洲洲東北對淵淵一名淵步洲江濱從洲頭以上悉壁立無岸歷專政至白沙方有浦上甚難江中有沙陽洲沙陽縣治也縣本江夏之沙羨矣晉太康中改曰沙陽縣宋元嘉十六年割隸巴陵郡江之右岸有雍口亦謂之流口東北流之長洋港東北流逕石子岡岡上有故城卽州陵縣之故城也莊辛所言左州侯國矣又東逕州陵新治南王莽之江夏也港水東南流注于江謂之洋口南對龍穴洲沙陽洲之下尾也洲裏有駕部口宋景平二年迎文帝於江陵法駕頓此因以爲名文帝車駕發江陵至此黑龍躍出負帝所乘舟左右失色上謂長史王曇首曰乃夏禹所以受天命矣我何德以堪之故有龍穴之名焉

江水東右得聶口

江浦也左對聶州

江水左逕百人山南

右逕赤壁山北昔周瑜與黃蓋詐魏武大軍所起也

江水東逕大軍山南

山東有山屯夏浦江水左迤也江中有石浮出謂之節度石石則塗水注之出江州武昌郡武昌縣秦山西北流逕汝南僑郡故城南咸和中寇難南逼戶口南渡因置斯郡治于塗口塗水歷縣西又西北流注于江

江水又東逕小軍山南

臨側江津東有小軍浦

江水又東逕雞翅山北

山東卽土城浦也

又東北至江夏沙羨縣西北沔水從北來注之

沌水上承陽縣之白湖東南流爲沌水逕陽縣南注于江謂之沌口有陽都尉治晉永嘉六年王敦以陶侃爲荊州鎮此明年徙林鄣

江水又東逕歎父山南對歎州

亦曰炭步矣江之右岸當鸚鵡洲南有江水右迤謂之驛渚三月以末水下通樊口水

江水又東逕魯山南

右翼際山也地說曰漢與江合于衡北翼際山傍者也山上有吳江夏太守陸渙所治城蓋取二水之名地理志曰夏水過郡入江夏也舊治安陸漢高帝六年置吳乃徙此城中有晉征南將軍荊州刺史胡奮碑又有平南將軍王世將刻石記征社曾事有劉琦墓及廟也山左卽沔水口矣沔左有却月城然亦曰偃月壘戴監軍築故曲陵縣也後乃沙羨縣治也昔魏將黃祖所守遣董襲陸統攻而禽之彌衡亦遇害於此衡恃才倜儻肆狂狷於無妄之世保身不足遇非其歿可謂咎悔之深矣江之右岸有船官浦歷黃鵠巖西而南矣直鸚鵡洲之下尾江水差曰狀浦是曰黃軍浦昔吳將黃蓋軍師所屯故浦得其名亦商舟之所會矣船官浦東卽黃鵠山林澗甚美譙郡戴仲若野服居之山下謂之黃鵠岸岸下有灣目之爲鵠灣鵠山東北對夏口城魏黃初二年孫權所築也依山傍江開勢明遠憑墉藉阻高觀枕流上則遊因流川下則激浪崎嶇寔舟人之所艱也對岸則入沔津故城以夏口爲名亦沙羨縣治也

水經 卷之三十五
江水左得湖口水通太湖又東合澗口水上承沔水
於安陸縣而東逕澗陽縣北東南注于江江水又東
湖水自北南注謂之嘉吳江右岸頗得二夏浦北對
東城洲西浦側有雍伏戍江之左岸東會龍驤水口
出北山蠻中江之有武口水上通安陸之延頭
宋元嘉二年衛將軍荊州刺史謝晦阻兵上流爲
征北檀道濟所敗走奔於此爲戍主光順之所執
處也南至武城俱入大江南直武洲洲南對楊桂
水口江水南出也通金女大文桃班三治吳舊地
所在荊州界盡此

江水東逕茗城南

庾仲雍江記曰茗城至武城口三十里者也南對
郭口夏浦而不常泛矣東得苦菜夏浦浦東有苦
菜夏江逕其北故浦有苦菜之名焉山上有菜苦
可食江水左得廣武口江浦也江之右岸有李姥
浦浦中偏無蚊蚋之患矣北對崢嶸洲冠軍將軍
劉毅破栢玄於此洲玄乃挾天子西走江陵矣
又東過邾縣南

江水東逕白虎巖北山臨側江濱又東會赤溪夏
浦二口江水右迤也又東逕具巖此庾仲雍謂之

沛岸矣江右岸有秋口江浦也又得東烏石水出
烏石山南流注于江

江水右得黎嶷北

亦曰黎岸也山東有夏浦又東逕上磧北山名也
仲雍謂之大小竹磧也北岸烽火洲卽舉洲也北
對舉口仲雍作莒字得其音而忘其事非也舉水
出龜頭山西北流逕龍戍南梁定州治蠻田超秀
爲刺史舉水又西流左合垂山之水水北出垂山
之陽與戈陽渾水同發一山故是水合之水之東
有南口戍又南逕方山戍西流注于舉水又西

南逕梁司豫二州東蠻曰魯生爲刺史治湖陂城
亦謂之水城也舉水又西南逕顏城南又西南逕
齊安郡西倒水注之出黃武山南流逕白沙戍西
又東南逕梁達城戍西東南合舉水舉水又南東
歷赤亭下又謂之赤亭水又分爲二水南流注于
江謂之舉洲南對舉洲春秋左傳定公四年吳楚
陣于伯舉京相璠曰漢東地矣夏有汜水或作舉
疑卽此也左水東南流入于江許曰文方口江之
右岸有鳳鳴口江浦也浦側有鳳鳴戍

江水又東逕邾縣故城南

水經

卷之三十五

十一

楚宣王滅邾徙居于此故曰邾也漢高帝三年項羽封吳芮爲衡山王都此晉咸和中庾翼爲西陽太守分江夏立四年豫州刺史毛寶西陽太守樊俊共鎮之爲石虎將張格度所陷自爾丘墟焉城南對蘆洲舊吳時客舍於洲上方便謂所止焉亦謂之羅州矣

鄂縣北江水右得樊口

庾仲雍江水記云谷里表口江津南入歷樊山上下三百里通新興馬頭二治樊口之北有灣昔孫權裝大船名之曰長安亦曰大舶載坐直之士三千人與群臣泛舟江津屬值風起權欲西取蘆州谷不從利乃拔刀急上令取樊口薄舶船至岸而敗故名其處爲敗舶灣因鑿樊山爲路以上人卽名其處爲吳造峴在樊口上一里今厥處尚存

江水又左逕赤鼻山南

山臨側江川

又東逕西陽郡南郡治卽西陽縣也

晉書地道記以爲弦子國也

江之右岸有鄂縣故城

舊樊楚也世本稱熊渠封其中子之名某者爲鄂

水經 卷之三五
王晉太康地記以爲東鄂矣九州記曰鄂今武昌也孫權以魏黃初元年中自公安徙此改曰武昌縣鄂縣徙治於袁山東又以其年立爲江夏郡分建業之民千家以益之至黃龍元年權遷都建業以陸遜輔太子鎮武昌縣皓亦都之皓還東令滕牧守之晉惠帝永平中始置江州傳綜爲刺史治此城後太尉庾亮之所鎮也今武昌郡治城南有袁山卽樊山也武昌記曰樊口南有大姥廟孫權常獵於山下依夕見一姥問權獵何所得曰正得一豹母曰何不豎豹尾忽然不見應劭漢官序曰豹尾過後執金吾罷屯解圍天子鹵簿中後屬車施豹尾於道路豹尾之內爲省中蓋權事應在此故爲立廟也又孫皓亦嘗登之使將害常侍王蕃而其首虎以爭之北背大江江上有釣臺權常極飲其上曰墮臺醉乃已張昭盡言處城西有郊壇權告天位于此顧謂公卿曰魯子敬嘗言此可謂明於事勢矣城東故城言漢將灌嬰所築也江中有節度石三段廣百步高五六丈是西陽武昌界分江於斯石也又得東五丈又得次浦江浦也東逕五嶼北有五山公次江陰故得是名矣仲雍謂

之五圻

江水左則巴水注之

水出雩婁縣之下靈山即大別山也與決水同出一山故世謂之分水山亦或曰巴山南歷蠻中吳時舊立屯於水則引巴水以溉野又南逕巴水戍南流注于江謂之巴口

又東逕較縣故城南

故弦國也春秋僖公五年秋楚滅弦弦子奔黃者也漢惠帝元年封長沙相利倉為侯國城在山之陽南對五洲也江中有五洲相接故以五洲為名宋孝武帝舉兵江州達牙洲上有紫雲蔭之即是洲也

東會希水口出灄縣霍山西麓山北有灄縣故城

地理志曰縣南有天柱山即霍山也有祠南嶽廟音潛齊立霍州治此西南流分為二水枝津出焉希水又南積而為湖謂之希湖湖水又南流逕較縣東而南流注于江是曰希口水者也然水流急濬霖雨暴病漂濫無常行者難之

大江右岸有厭里口安樂浦

從此至武昌尚方作部諸屯相接枕帶長江又東

得桑步步下有章浦本南陽郡治今悉荒蕪
江水左得赤水浦

夏浦也

江水又東逕南陽山南

又曰苟巖亦曰南陽巖仲雍謂之南陽圻一名洛
至圻一名石姥水勢迅急

江水又東逕西陵縣故城南

史記秦昭王遣白起伐楚取西陵者也漢章帝建
初二年封陰堂爲侯國

江水東歷孟家澆江之右岸有黃石山水逕其北

卽黃石巖也一名石茨圻有西陵縣也北縣則三
洲也山連逕江則東山偏高謂之西塞東對黃公
九巖所謂九圻者也於行小難兩山之間爲闕塞
也從此濟於土復土復者北岸地名也

又東過蘄春縣南蘄水從北東注之

江水右得常口江浦也浦東有葦山江水東逕山
北北崖有東湖口江波左迤流結成湖故謂之湖
口矣江水又東得空石口江浦在右臨江有空石
山南對石穴洲洲上有蘄陽縣治也又東蘄水注
之江水又東逕蘄春縣故城南世祖建武三十年

封陳俊子浮爲侯國也江水又東得銅零口江浦也大江右逕蝦蟇山北而東會海口水南通大湖北達于江水左右翼山江水逕其北東合臧口江浦矣江水又左逕長風山南得長風口江浦也江水又東逕積布山南俗謂之積布巖又曰積布圻庾仲雍所謂高山也此卽西陽尋陽二郡界也右岸有土復曰江浦也夾浦有江山山東口有護江浦也庾仲雍謂之朝二浦也

又東過下雉縣北刊水從東陵西南注之

江水東逕琵琶山南山下有琵琶灣也又東逕望夫山南又東得苦菜水水口夏浦也江之右岸富水注之水出陽新縣之青湓山西北流逕陽縣故豫章之屬矣地多女鳥玄中記曰新陽男子於水次得之遂與共居生二女悉衣羽而去豫章間養兒不露其衣言是鳥落塵於兒衣中則令兒病故亦謂之飛夜遊女矣又西北逕下雉縣王莽更名之潤兕矣後併新陽水之左右公私裂漑咸沃壤舊吳屯所在也江水口右東得蘭溪水口並江浦也

又東左得青林口

卽水出廬江郡之東陵鄉江夏有西陵縣故是言
東矣尚書云江水過九江至于東陵者也西南流
水積爲湖湖西有青林山宋太始元年明帝遣沈
攸之西伐子勣伐柵青山覩一童子甚麗問伐者
曰取此何爲答欲討賊童子曰下旬當平何勞伐
此在衆人之中忽不復見故謂之青林湖湖有鯽
魚食之肥美辟寒暑湖水西流謂之青林水又西
南歷尋陽分爲二水一水東流通大雷一水西南
流注于江經所謂刊水也右對馬頭岸自富口迄
此五千餘里岸阻江山

水經第三十五

水經第二十六

漢 桑欽撰

後魏酈道元注

明 吳中珩校

青衣水 洄水 若水 沫水

延江水 沅酉水 存水 温水

青衣水出青衣縣西蒙山東與沫水合也

縣故有青衣羌國也竹書紀年孝惠成王十年瑕
陽人自秦道嶠山青衣水來歸漢武帝天漢四年
分沈黎郡西部都尉青衣之王漢公孫述之有蜀

也青衣不服世祖嘉之建武十九年以爲郡安帝延光元年置蜀郡屬國都尉青衣王子心慕漢制上求內附順帝陽嘉二年改曰漢得此良臣也縣有蒙山青衣所發東逕其縣與沫水會於雋郡之靈關道青衣水又東邛水注之水出漢嘉嚴道邛來山東至蜀郡臨邛縣東入青衣水

至犍爲南安縣入于江

青衣水逕平鄉謂之平鄉江益州記曰平鄉江東逕峨眉山在南安縣界去成都南千里然秋日清澄望見兩山相峙如峨眉焉青衣水又東流注于

大江

桓水出蜀部岷山西南行羌中入于南海

尚書禹貢岷嶓旣藝沱潛旣道蔡蒙旅平和夷底績鄭玄曰和上夷所居之地也和讀曰洄地志曰洄水出蜀郡蜀山西南行羌中者也尚書又曰西傾因桓是來馬融王肅云西治傾山唯因桓水是來言無他道也余按經據書岷山西傾俱有桓水桓水出西傾山更無別流所導者唯斯水耳浮於潛漢而達江沔故晉地道記曰梁州南至桓水西底黑水東限扞闕今漢中巴郡汶山蜀郡漢嘉江

陽朱提涪陵陰平廣漢新都梓潼犍爲武郡上庸
魏興新城皆古梁州之地自桓水以南爲夷書所
謂和夷底績也然所可當者唯斯水與江耳桓水
蓋二水之別名爲兩江之通稱矣鄭玄注尚書言
織皮謂西戎之國也西傾雍州之山也雍戎二野
之間人有所事於京師者道當由此州而來桓是隴
坂名其道盤桓旋曲而上故名曰桓是今其下民
謂是坂曲爲盤也斯乃玄之別致恐乖尚書因桓
之義非浮潛入渭之文余考校諸書以具聞見今
略緝綜川流注泂之緒雖今古異容本其流俗粗
陳所由然自西傾至葭萌入于西漢卽鄭玄之所
謂潛水者也自西漢溯流而屆于晉壽界阻漾枝
津南歷岡穴迤邐而接漢泂此入漾書所謂浮潛
而逾沔矣歷漢川至南鄭縣屬于褒水溯褒暨于
衙嶺之南溪川皮灌于斜川屆于武功而北達于
渭水此乃水陸之相關川流之所經復不乖禹貢
入渭之宗實符尚書亂河之義也

若水出蜀郡旄牛徼外東南至故關爲若水也
山海經曰南海之內黑水之間有水名曰若水若
水出焉又云灰野之山有樹焉青葉赤華厥名若

木生崑崙山西附西極也淮南子曰若木在建木
西木有十華其光照下地故屈原離騷天問曰羲
和未陽若華何光是也然若水之生非一所也黑
水之間厥木所植水出其下故木受其稱焉若水
泂流間關蜀土黃帝長子昌意德劣不足紹承大
位降居斯水爲諸侯焉娶蜀山氏女生顓頊於若
水之野有聖德二十登帝位承少皞金宮之政以
水德寶歷矣若水東南流鮮水注之一名州江大
度水出徼外至髦牛道南流入于若水又逕越巂
大茆縣入繩繩水出徼外山海經曰巴遂之山繩
水出焉東南流分爲二水其一水枝流東出逕廣
柔縣東流注于江其一水南逕髦牛道至大茆與
若水合自下亦通謂之爲繩水矣茆夷也汶山曰
茆南中曰昆彌蜀曰邛漢嘉越巂曰茆皆夷種也
南過越巂邛都縣西直南至會無縣淹水東南流注
邛都縣漢武帝開邛茆置之縣陷爲池今因名爲
邛池南人謂之河河中有蛙巂山有巂水言越此
水以章休盛也後復反叛元鼎六年漢兵自越巂
水伐之以爲越巂郡治邛都縣王莽遣任貴爲領
戎大尹守之更名爲集巂也縣故邛都國也越巂

水卽繩若矣似隨水地而更名矣又有溫水冬夏
常熱其源可燂雞豚下湯沐洗能治宿疾昔李驤
敗李流於溫水是也若水又逕會無縣縣有駿馬
河水出縣東高山山有天馬徑厥跡存焉馬日行
千里民家馬牧之山下或產駿駒言是天馬子河
中有貝子胎銅以羊祠之則可取也又有孫水焉
水出臺高縣卽臺登縣也孫水一名白沙江南流
逕邛都縣司馬相如定西夷橋孫水卽是水也又
南至會無入若水若水又南逕雲南郡之蓬久縣
蜻蛉水入焉水出蜻蛉縣西東逕其縣下縣以氏
焉有石猪圻長谷中有石猪子毋數千頭長老傳
言夷昔牧此一朝化爲石迄今夷人不敢往牧貪
水出焉蜻蛉水又東注于繩水繩水又逕三絳縣
西又逕姑復縣北對三絳縣淹水注之三絳一曰
小會無故經曰淹至會無往若水水又與毋血水
合水出益州郡弄棟縣東農山毋血谷北流逕三
絳縣南北入繩水又東涂水注之水出建寧郡
之牧靡縣南山縣山並卽草以立名山在縣東北
焉甸山南五百里山生牧靡可以解毒百世方盛
烏多侯食烏啄口中毒必急飛往牧靡山啄牧靡

以解毒也涂水導源臈谷西北流至越巂入繩繩
水又逕越巂郡之馬湖縣謂之馬湖江又左合卑
水縣而東流注馬湖江也

又東北至犍爲朱提縣西瀘江水

朱提山名也應劭曰在縣西南以氏焉犍爲屬國
也在郡南千八百許里建安二十年立朱提郡郡
治縣故城郡西南二百里得所綰堂琅縣西北行
上高山羊腸繩屈八十餘里或攀木而升或繩索
相牽而上緣陟者若將階天故袁休明巴蜀志云
高山嵯峨巖石磊落傾側縈迴下臨峭壑行者扳

緣牽援繩索三蜀之人及南中諸郡以爲至嶮有
瀘津東去縣八十里水廣六七百步深十數丈多
瘴氣鮮有行者晉明帝太寧二年李驤等侵越巂
攻臺登縣寧州刺史王遜遣將軍姚岳擊之戰于
堂琅驤軍大敗岳追之至瀘水赴水歿者千餘人
遜以岳等不窮追怒甚髮上衝冠恰裂而卒案永
昌郡有蘭倉水出西南博南郡漢明帝永平十二
年置博南山名也縣以氏之其水東北流出博南
山漢武帝時通博南山道渡蘭倉津土地絕遠行
者苦之歌曰漢德廣開不賓渡博南越倉津渡蘭

倉爲作人山高四十里蘭倉水出金沙越人收以爲黃金又有光珠穴穴出光珠又有琥珀珊瑚黃白青珠也蘭倉水又東北逕不韋縣與類水合水出巖唐縣漢武帝置類水西南流曲折又北流東至不韋縣注蘭倉水又東與禁水合水自永昌縣而北逕其郡西水左右甚饒犀象山有鈎蛇長七八丈尾末有岐蛇在山澗水中以尾鈎岸上人牛食之此水傍瘴氣時惡氣中有物不見其形其作有聲中木則折中人則害名曰鬼彈惟十一月十二月差可渡正月至十月逕之無不害人故郡有罪人徙之禁防不過十日皆歿也禁水又北注瀘津水又東逕不韋縣北而東北流兩岸皆高山數百丈瀘峰最爲高秀孤高三千餘丈是山於晉太康中崩震動郡邑水之左右馬步之逕裁通而時有瘴氣三月四月逕之必歿非此時猶令人悶吐五月以後行者差得無害故諸葛亮表言五月渡瀘并日而食臣非不自惜也顧王業不可偏全於蜀故也益州記曰瀘水源出曲羅舊下三百里曰瀘水兩峯有殺氣暑月舊不行故武侯以夏渡爲艱瀘水又下合諸水而摠其目焉故有瀘江之名

水經 卷之三十六
矣自朱提至爨道有水步道有黑水羊官水至嶮
難三津之阻行者苦之故俗爲之語曰猶溪赤木
盤蛇七曲盤羊烏櫛氣與天通看都濩泚住柱呼
尹庾降賈子老擔七里又有牛叩頭馬搏頰坂其
艱嶮如此也

又東北至爨道縣入于江

若水至爨道縣又謂之馬湖江繩水瀘水孫水淹
水大渡水隨決入而納通稱是以諸書錄記羣水
或言入若又言注繩亦咸言至爨道入江正是異
水泂注通爲一津更無別川可以當之永有孝子
石西縣人有隗叔通者性至孝爲母給江膂水天
爲出平石至江膂中今猶謂之孝子石可謂至誠
發中而休應自天矣

沫水出廣柔徼外

縣有石細鄉禹所生也今夷人共營之地方百里
不敢居牧有罪逃野捕之者不逼能藏三年不爲
人得則共原之言大禹之神所祐之也

東南過旄牛縣北又東至越巂靈道縣出蒙山南
靈道縣一名靈關道漢制夷狄白道縣有銅山山
人有劉慈者太始九年黃龍二見于慈池縣令董

玄之率吏民觀之以白刺史王濬濬表上之晉朝
改護龍縣也沫水出岷山西東流過漢嘉郡南流
衝一高山山上合下開水逕其間山卽蒙山也

東北與青衣水合

華陽國記曰二水於漢嘉青衣縣東合爲一川自
下亦謂之爲青衣水水又東逕開邦縣故平鄉也
晉初置沫水又東逕臨邛南而東出于江源縣也
東入于江

昔沫水自蒙山至南安而溷崖山脉漂疾故害舟
船歷代爲患蜀郡太守李冰發卒鑿平溷崖河神
鼉怒冰乃操刀入水與神鬪遂平溷崖通正水路
開處卽冰所穿也

延江水出犍爲南廣縣又東至犍犸犞縣東屈北流
犞縣故犍爲郡治也縣有犍山晉建興元年置平
夷郡縣有犞水出犞邑西不狼山東與溫水合溫
水一曰煖水出犍爲符縣而南入犞水犞亦出符
縣南與溫水會闕駟謂之闕水俱南入犞邑犞水
於其縣而東注于延水延水又與漢水合出犍爲
漢陽道王莽之新通也山關谷東至犞邑入延江
水也

水經 卷之三十六
至巴郡涪陵縣注更始水

更始水即延江枝分之始也延水北入涪陵水涪陵水出縣東故邑郡之南鄱王莽更名巴亭魏武分巴丘爲涪陵郡張堪爲縣會公孫述擊堪同心義士選習水者筏渡堪於小別江即此水也其水北至枳縣入江更始水東入巴東之南浦縣其水注引瀆水石門空岫陰深邃澗闇密傾崖上合恒有落勢行旅避瘴將有逕之處無不危心於其下又謂之西鄉水亦謂之西鄉溪溪水間關二百許里方得出山又通波注遠復二百餘里東南又遷陵縣也

又東南至武陵西陽縣入于酉水

武陵先賢傳曰潘京世長爲郡主簿太守趙偉甚器之問京貴郡何以名武陵京答曰鄙郡本名義陵在辰陽縣界與夷相接數爲所破光武時移治東山之上遂爾易號傳曰止戈爲武詩云高平曰陵於是名焉酉水北岸有黟陽縣許慎曰溫水南入黟蓋斃水以下津流汭注之通稱也故縣受名焉西鄉溪口在遷陵縣故城上五十里左合酉水酉水又東際其故城北又東逕酉陽故縣南而東

出也兩縣相去水道可四百許里於酉陽合也

酉水東南至沅陸縣入于沅

存水出犍為郁郥縣

王莽之孱郥也益州大姓雍闥反結壘於山繫馬

柳柱柱生成林今夷人名曰雍無梁林梁夷言馬

也周水自縣東南流逕牧靡縣北又東逕且蘭縣

北而東南出也

東南至鬱林定周縣為周水

周水又東逕牂牁郡之無斂縣北而東南與無斂

水合矣水首受牂牁水東逕無斂縣為無斂水又

東注于存水存水又東逕鬱林定周縣為周水蓋

水變名也

又東北至潭中縣注于潭

溫水出牂牁夜郎縣

縣故夜郎侯國也唐蒙開以為縣王莽名曰同亭

矣溫水自縣西北流逕談臺與迷水合水西出益

州郡之銅瀨矣談虜山東逕臺縣右注溫水溫水

又西逕昆澤縣南又逕味縣縣又滇國都也諸葛

亮討平南中劉禪建興元年分益州郡置建寧郡

於此水側皆是高山山水之間悉是木耳夷居語

言不同嗜欲亦異雖曰山居土差平和而無瘴毒
溫水又西南逕滇池於西北池周三百許里上源
深廣下流淺狹似如倒池故曰滇池也長老傳下
流淺言池中有神馬家馬交之則生駿駒日行五
百里晉太元十四年寧州刺史費統言晉寧郡滇
池縣兩神馬一白一黑盤戲河水之上有滇州元
封三年立益郡治滇城劉禪晉寧郡治也溫水又
西會水澤與葉榆僕水合溫水又東南逕牂牁之
毋單縣建興中劉禪割屬建寧郡橋水注之水上
承俞亢之南池縣治龍池洲周四十七里一名河
水與邪龍分浦後立河陽郡治河陽縣縣在河源
州上又有雲平縣並在州中橋水東流毋單縣注
于溫溫水又東南與古郡之毋掇縣東王莽更名
有掇也與南橋水出縣之橋山東流梁水注之梁
水上承河水與俞元縣而東南逕興古之勝休縣
王莽更名勝熨縣梁水又東逕毋掇縣左注橋水
橋水又東注于溫溫水又東南逕律高縣南劉禪
建興三年分牂牁置興古治宛溫縣晉書地道記
治此溫水又東南逕梁水郡南溫水上合梁水故
自下通得梁水之稱是以劉禪分興古之盤南置

水經 卷之三十六
郡於梁水縣也温東南逕鐔封縣北又逕來唯縣
東而僕水右出焉

又東至鬱林廣鬱縣爲鬱水

秦桂林郡也漢武帝元鼎六年更名鬱林郡上莽
以爲鬱平郡矣應劭地理風俗記曰周禮鬱人掌
探器凡祭醑賓客之探事和鬱鬯以實樽彝鬱芳
草也百草之華煮以合釀黑黍以降神者也或說
今鬱金香是也一曰鬱人所貢因氏郡矣温水又
東逕增食縣有文象水注之其水道源牂牁句町
縣應劭曰故句町國也王莽以爲從化文象水蒙
水與盧唯水來細水伐水並自縣東歷黃鬱至增
食縣注于鬱水也

又東至領方縣東與斤南水合

縣有朱主水出臨塵縣東北流驤水注之水源上
承牂牁水東逕增食縣而下注朱主水朱主水又
東北逕臨塵縣王莽之監塵也縣有斤南水侵離
水並逕臨塵東入領方縣流注鬱水

東北入于鬱

鬱水卽夜郎豚水也漢武帝時有竹王興於豚水
有一女子浣于水濱有三節大竹流入女子足間

推之不去聞有聲持破之得一男兒遂雄夷濮氏
竹爲姓所損破竹於野成林王祠竹林是也王嘗
從人止大石上命作羹從者白無水王以劔擊石
出水今竹王水是也後唐蒙開牂牁斬竹王首夷
僚咸怨以竹王非血氣所生求爲立祠帝封三子
爲侯及歿配父廟今竹王三郎祠其神也豚水東
北流逕談犒縣東逕牂牁郡且蘭縣謂之牂牁水
水廣數里縣臨江上故且蘭侯國也一名頭蘭牂
牁郡治也楚將莊躋泝沅伐夜郎徑牂牁繫船因
名且蘭爲牂牁矣漢武帝元鼎六年開王莽更名
同亭在柱浦關牂牁亦江中兩山名也左思吳都
賦云吐浪牂牁者也元鼎五年武帝伐南越發夜
郎精兵下牂牁江同會番禺是也牂牁水又東南
逕毋歛縣西毋歛水出焉又東驩水出焉又逕鬱
林廣鬱縣爲鬱水又東北逕領方縣北又東逕布
山縣北鬱林郡治也吳陸緒謂子績曰從今以後
六十年車同軌書同文至太康元年晉果平吳又
逕中留縣南與溫水合又東入阿林縣潭水注溫
水出武陵郡潭城縣玉山東流逕鬱林郡潭中縣
周水自西南來注之潭水又東南流與剛水合水

西出牂牁毋歛縣王莽之有歛也東至潭中入潭潭水又逕中留縣東阿林縣西右入鬱水地理志曰橋水東至中留入潭又云領方縣而有橋水余訖其川流更無殊津正是橋温亂流故蕪通稱作者咸言至中留入潭潭水又得鬱之蕪稱而字當爲南南橋水也蓋書字誤矣鬱水右則留水注之水南出布山縣下逕中留入潭潭水東逕阿林縣又東逕猛陵縣浪水注之又東逕蒼梧廣信縣灘水注之鬱林又東封水注之出臨賀郡馮乘縣西謝沐縣東界牛屯山謂之臨賀東南流萌渚嶠西

又東南左合嶠水庾仲初云水出萌渚嶠南流入于臨臨水又逕臨賀縣東又南至郡左會賀水水出東北興安縣西北有羅山東南流逕興安縣西盛弘之荊州記云興安縣水邊有平石上有石履言越王渡溪脫履於此賀水又西南流至臨賀郡東右注臨水郡對二水之交會故郡縣取名焉臨水又西南流逕郡南又西南逕封陽縣東爲封谿水故地理志曰縣在封水又西南流入廣信縣南流注于鬱水謂之封溪水口者也鬱水又東逕高要縣牢水注之牢水南出交州合浦郡治合浦縣

漢武元鼎六年平越所置也王莽更名曰桓合縣
曰桓亭孫權黃武七年改曰珠官郡郡不產穀多
採珠寶前政煩苛珠徙交趾會稽孟伯周爲守有
惠化去珠復還郡統臨先縣王莽之大允也牢水
自縣北流逕高要縣入于鬱水鬱水南逕廣川南
海郡西浪水出焉又南右納西隨三水又南逕西
會浦水上承日南郡盧容縣西古郎究浦內漕口
馬援所漕水東南屈曲通郎湖湖水承金山郎究
究水北流左會盧容壽泠二水盧容水出西南區
粟城南高山山南長嶺連接天障嶺西盧容水湊
隱山遶西衛北而東逕區粟城北又東右與壽泠
水合水出壽泠縣界魏正始九年林邑進侵至壽
泠縣以爲界疆卽此縣也區粟城南長嶺東壽泠
縣以水湊故水得其名隱山繞東逕區粟故城南
考古志並無區粟之名應劭地理風俗記曰日南
故秦象郡漢武帝元鼎六年開日南郡治西捲縣
林邑記曰城去林邑步道四百餘里交州外城記
曰從日南郡南去到林邑國四百餘里淮逕相符
然則城故西捲縣也地理志曰水入海有竹可爲
杖王莽更之曰日南亭林邑記曰其城治二水之

間三方際山南北瞰水東西澗浦流湊城下城西折十角周圍六里一百七十步東西度六百五十步磚城二丈上起磚墻一丈開方隙孔塼上倚板板上五重層閣閣上架屋屋上架樓樓高者七八丈下者五六丈城開十三門凡殿南向屋宇二千一百餘間市居周匝繞岨峭地險林邑故兵器戰具悉在區粟多城壘自林邑王范胡達始秦餘徙民染同夷化日南舊風變易俱盡巢棲樹宿負郭接山榛棘蒲薄騰林拂雲幽煙冥緬非生人所安區粟建八尺表日影度南八寸自此影以南在日之南故以名郡望北辰星落在天際日在北故開北戶以向日此其大較也范秦古今善言曰日南張重舉計入洛正旦大會明帝問日南郡北向視日也重曰今郡有雲中金城者必不皆有其實日亦俱出於東耳至於風氣暄暖日影仰當官民居止隨情面向東西南北迴背無定人性凶悍果於戰鬪便山習水不閑平地古人云五嶺者天地以隔內外况綿途於海表顧九嶺而彌邈非復行路之逕岨信幽荒之冥域者矣壽冷水自西南東與盧容水合東注郎究究水所積下潭爲湖謂之狼

水經 卷之三十六
湖浦口有秦時象郡墟城猶存自湖南望外通壽
泠從郎湖入四會漕元嘉二十年以林邑頑凶歷
代難化恃遠負衆慢威背德北寶旣臻南金闕貞
乃命偏將與龍驤將軍交州刺史檀和之陳兵日
南修文服遠二十三年揚旌從四會漕口入郎湖
軍次區粟進逼圍城以飛梯雲橋懸樓登壘鉦鼓
天作虎士電怒風烈火揚城摧衆陷斬區粟王范
扶龍首十五以上戮截無赦樓閣雨血填尸城觀
自四會南入得盧容浦口晉太康三年省日南部
屬國都尉以其所統盧容縣置日南郡及象林縣
之故治晉書地道記曰郡去盧容浦口二百里故
秦象林郡象林縣治也永和五年征西桓温遣督
護膠峻率交會兵伐范文於舊日南之盧容縣爲
文所敗即是處也退次九真更治兵文被創死子
佛代立七年峻與交州刺史楊平復進軍壽泠浦
入頓郎湖討佛于日南故治佛蟻聚連壘五十餘
里峻平破之佛逃竄川藪遣大師面縛請罪軍門
遣武陳延勞佛子與盟而還康泰扶南記曰從林
邑至日南盧容浦口可二百餘里從口南發往扶
南諸國常從此口出也故林邑記曰盡紘滄之徼

遠極流服之無外地濱滄海衆國津逕鬱林南倉
通壽泠卽一浦也浦上承交阯郡南都官塞浦林
邑記曰浦通銅鼓外越安定黃岡心口蓋籍度銅
鼓卽越駱也有銅鼓因得其名馬援取其鼓以鑄
銅馬至鑿口馬援所鑿內通九真浦陽晉書地道
記九德郡有浦陽縣交州記曰鑿南塘者九真路
之所經也去州五百里建武十九年馬援所開林
邑記曰外越紀粟望都紀粟出浦陽渡便州至與
由渡故縣至咸驩咸驩屬九真咸驩已南麇麇滿
岡鳴咆命疇警嘯聒野孔雀飛翔蔽日籠山渡治

日至九德按晉書地道記有九德縣交州外城記
曰九德縣屬九真郡在郡之南與日南接蠻盧輦
居其地死子寶綱代孫黨服從吳化定爲九德郡
又爲隸之林邑記曰九德九夷所極故以名郡郡
名所置周越裳氏之夷國周禮九夷遠極越裳白
雉象牙重九譯而來自九德道類口水源從西北
遠荒逕寧州界來也九德浦內逕越裳究九德究
南陵究按晉書地道記九德郡有南陵縣置也竺
芝扶南記山溪瀨中謂之究地理志曰郡有小水
五十二并行大川皆究之謂也林邑記曰義熙九

九系 卷之三十六
年交阯太守杜慧度造九真水日與林邑王范胡
達戰擒斬胡達二子虜獲百餘人胡達限五月慧
度自九真水歷都粟浦復襲九真長圍跨山重柵
斷浦驅象前鋒接刃城下連日交戰殺傷乃退地
理志曰九真郡漢武帝元鼎六年開治胥浦縣王
莽更之曰驩城也晉書地道記曰九真郡有松原
縣林邑記曰松原以西鳥獸馴良不知畏弓寡婦
孤居散髮至老南移之嶺崒不踰仞倉庚懷春於
其北翡翠熙景乎其南雖嚶謹接響城隔殊非獨
步難遊俗姓塗分故也自南陵究出于南界蠻進

得橫山太和三年范文侵交州於橫山分界度此
景廟由門浦至古戰灣吳赤烏十一年魏正始元
年交州與林邑於灣大戰初失區粟也渡盧容縣
日南郡之屬縣也自盧容縣至無戀越烽火至比
景縣日中頭上影當身下與影爲比如淳曰故以
比影名縣闕駟曰比讀陰庇之庇影在已下言爲
身所庇也林邑曰渡庇景至朱吾朱吾縣浦今之
封界朱吾以南有文狼人野居無室宅依樹止宿
魚食生肉採香爲業與人交市若上皇之民矣縣
南有文狼究下流逕通晉書地道記曰朱吾縣屬

日南郡去郡二百里比縣民漢時不堪二千石長
吏調求引屈都乾爲國林邑記曰屈都夷也朱吾
浦內通無勞湖無勞究水通壽泠浦元嘉元年交
州刺史阮彌之征林邑楊邁出婚不在奮威將軍
阮謙之領七千人先襲區粟以過四會未入壽泠
三日三夜無頓止處凝海直岸遇風大敗楊邁攜
婚都部伍三百許船來相救援謙之遭風餘數船
艦夜於壽泠浦裏相遇閭中大戰謙之手射楊邁
施工船敗縱橫崑崙單舸接得楊邁譙之以風溺
之餘制勝理難自此還渡壽泠至溫公浦升平三
年溫放之征范佛於灣分界陰陽折入新羅灣至
焉下一名阿賁浦入彭龍灣隱避風波即臨邑之
海渚元嘉二十三年交州刺史檀和之破區粟已
飛旂蓋海將指典冲於彭龍灣上鬼塔與林邑大
戰還渡典冲林邑入浦令軍水進持重故也浦西
卽林邑都也治典冲去海岸四十里處荒流之徼
表國越裳之疆南秦漢象郡之象林縣也東濱滄
海西際徐狼南接扶南北連九德後去象有林邑
之號建國起自漢末初平之亂人懷異心象林功
曹姓區有子名連攻其縣殺令自號爲王值世亂

水經 卷之三十六
離林邑遂立後乃襲代傳位子孫三國鼎爭未有
所附吳有交土與之鄰接進侵壽冷以爲疆界自
區連以後國無文史失其纂代世數難詳宗胤滅
絕無復種裔外孫范熊代立人情樂推後熊死子
逸立有范文日南西捲縣夷師雅夷奴也文爲奴
時山澗牧羊於澗水中得兩鱧魚隱藏挾歸規欲
私食郎知檢求文大慙懼起託云將礪石還非爲
魚也郎至魚所見是兩石信之而去文始異之石
有鐵文入山中就石治鍊鍛作兩刀舉刃向鄣因
祝曰鱧魚變化治石成刀斫石鄣破者是有靈神
文當治此爲國君王斫不入者是刀無神靈進斫
石鄣如龍淵干將之斬蘆臺由是人情漸附今斫
石尚在魚刃猶存傳國子孫如斬蛇之劍也雅嘗
史文遠行商賈北到上國多所聞見以晉愍帝建
興中南至林邑教王范逸制造城池繕治戎甲經
始廟略王愛信之使爲將帥能得衆心文讒王諸
子或奔王乃獨立成帝咸和六年死無胤嗣文迎
王子於外國海行取水置毒柳子中飲而殺之遂
脅國人自立爲王取前王妻妾置高樓上有從已
者取而納之不從已者絕其飲食乃死江東舊事

水經 卷之三十六
云范文本揚州人少被掠爲奴賣墮交州年十五
六遇罪當得杖畏怖因逃隨林邑賈人渡海遠去
沒入于王大被幸愛經十餘年王死文害王二子
詐殺侯將自立爲王威加諸國或夷椎蠻語口食
鼻飲或雕面鏤身脫裸種漢魏流赭咸爲其用建
元二年攻日南九德九真百姓奔迸千里無煙乃
還林邑林邑西去廣州二千五百里城西南角高
山長嶺連接天鄣嶺北接澗大源淮水出鄒鄒遠
界三重長洲隱山繞西衛山迴東其嶺南開澗小
源淮水出松根界上山壑流隱山繞南曲街迴東
合淮流以注典冲其城西南際山東北瞰水重壑
流浦周繞城下東南壑外因傍薄城東西橫長南
北縱狹北邊西端迴折曲入城周圍八里一百步
塼城二丈上起塼墻一丈開方隙孔上倚板板上
層閣閣上架屋屋上構樓高者六七丈下者四五
丈飛觀鷗尾迎風拂雲綠山瞰水騫翥嶺巒但制
造壯拙稽古夷俗城開四門東爲前門當兩淮渚
濱於曲路有古碑夷書銘讚前王胡達之德西門
當兩重壑北迴上山山西卽淮流也南門渡兩重
壑對温公壘升平二年交州刺史温放之殺交阯

太守寶別駕阮郎遂征林邑水陸累戰佛保城自
守重求請服聽之今林邑東城南五里有温公二
壘是也北門濱淮路斷不通城內小城周圍三百
二十步合堂瓦殿南壁不開兩頭長屋脊出南北
南擬背曰西區城內石山順淮面陽開東向殿飛
檐鴟尾青瓊丹墀榱桷多諸古法閣殿上柱高
城上餘五牛屎爲塗墻壁青光迴度曲掖綺牖紫
牕椒房嬪媵無別宮觀路寢永巷共在殿上臨踞
東軒逕與下語子弟臣侍皆不得上屋有五十餘
丘連薨接棟檐宇如承神祠鬼塔小大八廟層臺

重榭狀似佛刹郭無市里邑寡人居海岸蕭條非
生民所處而首渠以永安養國十世豈久存哉元
嘉中檀和之征林邑其王楊邁舉國夜奔竄山藪
據其城邑收寶巨億軍還之後楊邁歸國家國荒
彌時人靡存躊躇崩擗憤絕復蘇即以元嘉二十
二年死初楊邁毋懷身夢人鋪楊邁金席與其兒
落席上金光已起昭晰艷曜華俗謂上金爲紫磨
金夷俗謂上金爲楊邁金父胡達死襲王位能得
人情自以靈夢爲國祥慶其太子初名咄後楊邁
死咄年十九代立慕先君之德復故名楊邁昭穆

二世父子共名知林邑之將亡矣其城隍壘之外
林棘荒蔓榛梗冥鬱藤盤筍秀參錯際天其中香
桂成林氣清煙澄桂父縣人也棲居此林服桂得
道時禽異羽翔集間關無比翼鳥不比不飛鳥名
歸飛鳴聲自呼此戀鄉之思孔悲桑梓之敬成俗
也豫章俞益期性氣剛直不下曲俗容身無所遠
適在南與韓康伯書曰惟檳榔樹最南遊之可觀
但性不耐霜不得北植不遇長者之目令人恨深
嘗對飛鳥戀土增思寄意謂此鳥其背青其腸赤
丹心外露鳴情未達終日歸飛飛不十千路由萬

里何由歸哉九真太守任延始教耕犁俗化交十
風行象林知耕以來六百餘年火耨耕藝法與華
同名白田種白穀七月火作十月登熟名赤田種
赤穀十二月作四月登熟所謂兩熟之稻也更於
草甲萌芽穀月代種種稔早晚無月不秀耕耘功
重收穫利輕熟速故也米不外散恒爲豐國桑蠶
年八熟繭三都賦所謂八蠶之綿者矣其小水崖
幕巖常吐飛溜或雪霏沙漲清寒無底分溪別壑
津濟相通其水自城東北角流水上懸起高橋渡
淮北岸即彭龍區粟之通達也檀和之東橋大戰

楊邁被剗落象即是處也其水又東南流逕船官口船官川源徐即外夷皆裸身男以行筒掩體女以樹葉蔽形外名狼臚所謂裸國者也雖習俗裸袒猶耻無蔽惟依暝夜與人交市閭中與金便知好惡明朝曉看皆如其言自此外行得至扶南按竺芝扶南記曰扶南去林邑四千水步道通檀和之令軍入邑浦據官船口城六里者也自船官下注大浦之東湖大水連行湖上西流潮水日夜長七八尺從此以西朔望并潮一上七日水長丈六七七日之後日夜分爲再潮水長一二尺春夏秋

冬厲然一定高下定渡水無盈縮是曰海運亦曰象水也又兼象浦之名晉功臣表所謂金潏清逕象渚澄源者也其川浦渚有水蟲彌微攢木食船數十日壞源潭湛瀨有鮮魚色黑身五丈頭如馬首伺人入水便來爲害山海經曰離耳國雕題國皆在鬱水南林邑記曰漢置九郡儋耳預焉民好徒跣耳廣垂以爲飾雖男女褻露不以爲羞暑褻薄日自使人黑積習成常以黑爲美離騷所謂玄國矣然則儋耳卽離耳也王氏交廣春秋曰朱崖儋耳二郡與交州俱開皆漢武帝所置大海中南

極之外對合浦徐聞縣清朗無風之日遙望朱崖
州如困廩大從徐聞對渡北風舉帆一日一夜而
至周迴二千餘里徑度八百里人民可十萬餘家
皆殊種異類被髮離身而女多姣好白皙長髮美
鬢犬羊相聚不服德教儋耳先廢朱崖數叛先帝
以賈捐之議罷郡楊氏南裔異物志曰儋耳俱在
朱崖分爲東蕃故山海經曰在鬱水南也鬱水又
南自壽泠縣注于海昔馬文淵積石爲塘達于象
浦建金標爲南極之界俞益期牋曰馬文淵立兩
銅柱於林邑岸北有遺兵十餘家不反居壽泠岸
南而對銅柱悉姓馬自婚姻今有二百戶交州以
其流寓號曰馬流言語飲食尚與華同山川移易
銅柱今復在海中正賴此民以識故處也林邑記
曰建武十九年馬援樹兩銅柱於象林南界與西
屠國分漢之南疆也土人以之流寓號曰馬流世
稱漢子孫也山海經曰鬱水出象郡而西南注南
海入項陵東南者也應劭曰鬱水出廣信東入海
言始或可終則非矣

其水出山南曰黑水言其水色黑也
 白雲為十六中書對峙西陽對峙
 餘國全數之南羅山土人以其水
 謂之白雲山南曰黑水出於西南

水經第三十六

其水出山南曰黑水言其水色黑也

